

Tsa Janahá Ra Jesucristo Tsi Ra Juan

Tsa nyehé ra Juan

¹ Nyoo tavā tyiñu ra tsi ra Jesucristo tyin cuhva cuenda ra tsí ra jahá tyiñu tyiñu ra tyin tsa cuyatayin cuii jahaha ra tsa cua jahaha ra. Tan jaquitsí ra Jesucristo iin ángel ra tan tsahá cuenda ra tandihí tsa cua cuvi tsi yuhu, ra Juan, ra cuví musu ra. ² Tan caahán yu tandihí tsa nyehé yu. Tan cuví yu tsandaa tsa cuenda tuhun Nyoo tsa jacoto ra Jesucristo tsi yu.

³ Sii xaan cuví tsi nyíví tsa cua cahvi tuhun Nyoo tsa nyaá nu tutu ihya tan cuñí ñi tuhun caahán tsi tan tyaa yahvi ñi itsi, tyin tandihí tuhun tsa nyaá nuu tutu ihya, tsa yatyin cuii cundaa tsi.

Nu jacuhun ra Juan tutu tsi nyíví tsa utsa taahan vehe ñuhu

⁴ Yuhu ra Juan jaquitsí yu tutu ihya tsi nyooho, nyíví tsicá tsa utsa vehe ñuhu tsa cayucú ityi Asia. Na nasoco Nyoo tsi ndo. Tan tacan tucu tsa utsa tatyí ii tsa iyó nu ndacá ñaha ra. Tan na coo tsa taxin añima ndo jahá ra. Nyoo tacan ñi iyó maa ra, juvin ra cuví Nyoo nda tsanaha, tan vityin, tan juvin ra cua quitsi. ⁵ Tan naquihin tucu ndo tsa vaha jahá ra Jesucristo. Tyín ra ican cuví ra tsandaa tan tsa nditsa. Juvín ra cuví ra tsa nandoto tsa jihna ñi. Tan ndacá ñaha ra tsi ra cuví rey tsa iyó nu ñuhu ñayíví ihya naha ra. Tan cuñí xaan ra tsi yo, tan nacatya ra tsi yo tsihin niñi ra.

⁶ Tan tsahá ra tsa cuví yo rey tan cuví yo jutu tyin jahá tyiñu yo tyiñu Nyoo Jutu ra. ¡Na jacobahnu yo tsi ra tan na ña cundihí maa tsa ndacá ñaha ra! Tan nacuvi tsi tacan.

⁷ ¡Nyehe jihna ndo! ¡Tsa vatsí ra Cristo nu vico andiví! Tandihí nyíví cua nyehe ñi tsi ra nda cuanda nyíví tsa jañicueehé tsi ra tan cua nyehe ñi tsi ra. Tan tandihí ñi cua vacu xaan ñi tyin cua nayuhvi ñi nyehe ñi tsi ra inga tsaha tyin juvin ñi maa ra cuví. Nditsa, tacan cua cuvi, tan na cuvi tsi tacan ñi.

⁸ Catyí Jutu Mañi yo:

—Yuhu cuví ra jihna ñi, tan yuhu cuví ra cua coo nu cua ndihí quíví, tumaa letra A tan Z —catyí Jutu Mañi yo, ra iyó tandihí tunyee iñi tsi. Tacan ñi iyó maa ra: Juvin ra cuví Nyoo nda tsanaha, tan vityin, tan juvin ra cua quitsi.

Nu nyehe ra Juan tsa iyo caá ra Cristo

⁹ Yuhu ra Juan cuví yu yañi ndo. Tan iin caa ñi nyehé yu tundoho tsihin ndo, tan ndacá ñaha Nyoo tsi yo, tan iin caa ñi cunyee xaan iñi yo náa cuví tsi yo tyin jatyinyéé ra Jesucristo tsi yo. Nyíí yu vehe caa ñuhu Patmos tsa canyií mahñu ndutya ñuhu. Nyíí yu vehe caa tsa cuenda tsa caahán yu tuhun Nyoo tsa jacuahá ra Jesucristo. ¹⁰ Tan iin tumingu quíví jacobahnu yo tsi Jutu Mañí yo, tuví iñi yu tsa nyaá Tatyi Ii Nyoo tsihin yu. Tan tsíñi yu iin ndusu ñihi xaan ityi tsata yu, tumaa ndusu trompeta. ¹¹ Tan catyí tsi tsihin yu tyehen:

—Yooho, Juan. Yuhu cuví ra jihna ñi, tan yuhu cua coo nu cua ndihí quíví. Tyáa nu iin tutu tandihí tsa cua nyehe un. Tan jacuhun itsi vehe ñuhu tsa utsa ñuu tsa cayucú ityi Asia: vehe ñuhu ñuu Éfeso,

vehe ñuhu ñuu Esmirna, vehe ñuhu ñuu Pérgamo, vehe ñuhu ñuu Tiatira, vehe ñuhu ñuu Sardis, vehe ñuhu ñuu Filadelfia, tan vehe ñuhu ñuu Laodicea —catyí ndusu can tsihin yu.

¹² Tacan tan nyicó coo yu tyin cuñí yu nyehe yu yóo caahán tsihin yu. Tan nyehe yu utsa taahan candileru xuhun cuaan. ¹³ Tan mahñu tsa utsa taahan candileru can, nyehe yu nyaá iin ra tsa caá tumaa caá rayii ñuhu ñayiví ihya. Nditsí ra jahma cañi nda nu tsaha ra. Tan yihí iin cinturón xuhun cuaan yiquí nyica ra. ¹⁴ Tan ixi jiñi ra cuitsin tsi, tumaa cuitsin ixi mbee, tan tumaa cuitsin catyi. Tan tinuu ra caá tsi tumaa caá nu cayú ñuhu. ¹⁵ Tan xiñú xaan tsaha ra tumaa xiñú iin caa tsa nañí bronce tsa tuhvá yo nacuhvá tsa yaha quita can tsitsi ono nu cayú ñuhu. Tan ñihi xaan ndusu ra tumaa ndusu ndutya cuaha. ¹⁶ Tan ndaha cuaha ra nyecú utsa taahan tiñuu andiví. Tan tuhun quitá yuhu ra caá tsi tumaa caá mityi tsa xaan nduvi tsiyo yuhu. Tan nuu ra caá tsi tumaa caá tun ñihi xaan nyehé ñicanyii.

¹⁷ Cuhva tsa nyehe yu tsi ra, nduvá yu tsaha ra tumaa tsa tsihí yu. Maa tyin tyiso ra ndaha cuaha ra siqui yu, tan catyí ra tsihin yu:

—Ña nayuhvi un. Yuhu cuví ra jihna ñi, tan yuhu cua coo nu cua ndihí quivi. ¹⁸ Yuhu nyito yu vasu tsihí yu, maa tyin vityin ña cua cundihi maa tsa iyó yu. Tan iyó ndatu tsi yu tsa catyi yu ama taahán tsi cíu nyivi, tan tatus cuhun ñi anyaya o ña cuhun ñi. ¹⁹ Tyáa nu libru tandihí tsa nyehe un, tan tsa iyó vityin, tan tsa cua coo nu cuahán ca tsi. ²⁰ Tuhun ihya cuví tuhun xeehe cuenda tsa utsa tiñuu tsa nyecú ndaha cuaha yu, tan tsa cuenda tsa

utsa candileru xuhun cuaan can: Tsa utsa tiñuu can caahán tsi cuenda tsa utsa ra caahán tuhun yu tsa utsa vehe ñuhu. Tan tsa utsa candileru can cuñí tsi catyi tsa utsa vehe ñuhu.

2

Nu quitsahq tsahá cuenda ra Cristo tsinyivi tsicá tsa utsa vehe ñuhu: Tsa tsahq cuenda ra tsi nyivi tsicá vehe ñuhu ñuu Éfeso

¹ 'Jäcu hun tutu tsi ra caahán tuhun yu tsihin nyivi tsicá vehe ñuhu ñuu Éfeso. Tan catyi tsihin ra tyehen: "Tyehen catyí ra tsa nyecú utsa tiñuu ndaha cuaha, tan tsicá nuu ra mahñu tsa utsa candileru xuhun cuaan: ² Yuhu tsitó yu tandihi tsa jahándo. Tan nyehé yu tyin ñihi xaan jahátyiñu ndo tan cunyeé xaan iñi ndo. Tan tsitó yu tyin ña cuñí ndo nyehé ndo tsi nyivi caquiñi. Tan tsitó yu tyin tuhvá ndo nducu cuhva tsi ra tsa catyí tyin ra tsicá tyiñu Nyoo cuví ra naha, tan tsitó ndo tyin ña nditsa ra naha. ³ Cunyeé xaan iñi ndo. Tan nyehé xaan ndo tundoho tan jahátyiñu xaan ndo tsa cuenda yu tsihin tsa ña ndu uvi iñi ndo. ⁴ Maa tyin iyó iin tsa ña vaha jahándo, tyin ña cuñí ca ndo tsi yu vityin tumaa tsa cuñí ndo tsi yu quivi jihna ñi. ⁵ Yacan cuenda nducuhun iñi ndo numaa nda nduvá ndo. Tan násama ndo cuhva iyó ndo, tan jahaha nyico ndo tumaa jahahá ndo quivi naquihín cuenda ndo tsi Nyoo. Tatun ña násama ndo cuhva iyó ndo, tsa nyaá tsa cua quitsi yu nu yucú ndo, tan quinyaa yu candileru ndo nu nyaá tsi. Maa tyin tatuñu ndu uvi iñi ndo cuatyí ndo, ña cua quitsi yu quinyaa yu itsi. ⁶ Cuaha tsa

ña vaha javahá ndo, maa tyin iyó tucu tsa vaha javahá ndo, tyin ña cuñí ndo nyehe ndo tsa caquiñi tsa javahá nyiví yihí cuenda ra Nicolás. Tacan tucu yuhu ña taahán iñi yu nyehé yu yacan. ⁷ Nyooho tsa iyó soho, tyáa soho ndo tsa caahán Tatyi Ii Nyoo tsihin nyiví tsicá vehe ñuhu. Catyí ra tyehen: Tatun cuvi jaha canaa ndo tsi nu ña vaha, cuhva yu tsa catsi ndo tsiti yutun tsa tsahá tsa coo nyito añima ndo. Tan yutun can nyaá tun nda nu iyó Nyoo nda gloria, tyin ndacan, maa ñi maa tsa vaha iyó.”

*Tsa tsahá cuenda ra Jesucristo tsi nyiví tsicá
vehe ñuhu ñuu Esmirna*

⁸ Jacuhun ndihí tutu tsi ra caahán tuhun yu tsihin nyiví tsicá vehe ñuhu ñuu Esmirna, tan cätyi tsihin ra tyehen: “Tyehen catyí ra cuví tsa jihna ñi, ra cua coo nu cua ndihí quiví, ra tsa tsihí tan nandoto: ⁹ Yuhu nyehé yu tandihí tsa javahá ndo. Tan tsitó yu tyin nyehé xaan ndo tundoho. Tan tsitó yu tsa ndaahvi ndo, maa tyin tsihin tuhun Nyoo cuca ndo. Tan tsitó yu tsa caahán nyiví Israel ndavaha ñi siquí ndo. Tan ndi ñavin ñi Israel cuví ñi tsitsi añima ñi tyin cuenda nu ña vaha, nu nañí Satanás, cuví ñi. ¹⁰ Maa tyin ña nayuhvi ndo tsa nyehé ndo tundoho. Tyin nu ña vaha cua tyihi nu tsi juhva ndo vehe caa, tyin cua nducu cuhva nu tsi ndo tatun cua jaña ndo tsi Nyoo. Tan utsi quiví cua nyehe ndo tundoho. Maa tyin cuanyicun vaha ndo tsi Nyoo nda cuanda cúu ndo. Tan yuhu cua cuhva yu ñayiví coo ndo tsihin Nyoo. ¹¹ Nyooho tsa iyó soho, tyáa soho ndo tsa caahán Tatyi Ii Nyoo tsihin nyiví tsicá vehe ñuhu. Catyí ra tyehen: Tatun

cuví jaha canaa ndo tsi nu ña vaha, ña cua cuhun
ndo anyaya, quíví cúu nyíví tsa tsinu uvi tsaha.”

*Tsa tsahá cuenda ra Jesucristo tsi nyíví tsicá
vehe ñuhu ñuu Pérgamo*

¹² 'Jacuhun tucu tutu tsi ra caahán tuhun yu
tsihin nyíví tsicá vehe ñuhu ñuu Pérgamo. Tan
catyi tsihin ra tyehen: “Tyehen catyí ra tsa ndahá
mityi tsa xaan nduvi tsiyo yuhu: ¹³ Yuhu nyehé
yu tandihí tsa javahá ndo. Tan tsitó yu tyin vaha
jovahá ndo tyin ña jandihí ndo tsa tsinú iñi ndo
tsi yu. Tan tacan ñi tsinú maa iñi ndo tsi yu vasu
ndi maa iyó ndo nu iyó nu Satanás, nu ndacá
ñaha nu, nu tsahñí nyíví tsi ra Antipas, ra tsa cuví
tsandaa cuenda yu. ¹⁴ Maa tyin quituví juhva tsa
jovahá ndo nuu yu: Tyin ñuu Pérgamo nu yucú ndo
ihya, yihí ra tsa ña cuñí jandihí cuhva tsa javahá
ra Balaam, ra tsicoq tsanaha. Tyin ra Balaam
natyuhú ra tsi ra Balac, na jacatsi ra cuñú quiti
tsa jamañí nyíví nu tsitoho tsi nyíví Israel. Tan
natyuhú ra tsi ra na catyi ra tsihin ñi tyin ñavin
cuatyí cuví tun iin ñaha tan iyó ña tsihin iin rayii
vasu ña tindahá ñi, tan tacan tucu ñi rayii. ¹⁵ Tan
juvin ñi iyó tucu juhva nyíví tsa ña cuñí nacoo
tsa jacuahá ra yihí cuenda ra Nicolás. Tan yuhu
ndasi cuñí yu nyehe yu tsa jacuahá ra can naha ra.
¹⁶ Yacan cuenda janumi ndo nasama ndo cuhva iyó ndo,
cua quitsi yu nu yucú ndo tsa numi ñi tan cua cañi
tahan yu tsihin nyíví tsa javahá tacan tsihin mityi
[tsa cuví tuhun] quitá yuhu yu. ¹⁷ Nyoooho tsa iyó
soho, tyaa soho ndo tsa caahán Tatyi Ii Nyoo tsihin
nyíví tsicá vehe ñuhu: Tatun cuvi jaha canaa ndo

tsi nu ña vaha, cua cuhva yu tsa catsi ndo paan tsa cuví maná tsa nyíi xeehe. Tan cua cuhva yu iin yuu cuitsin tsi ndo. Tan nu yuu can nyaá iin síví tsaa tsa yoñi tsitó; intuhun ñi nyíví tsa cua naquihin yuu can cua coto síví can.”

Tsa tsahq cuenda ra Jesucristo tsi nyíví tsicá vehe ñuhu ñuu Tiatira

¹⁸ 'Jacuhun tucu tutu tsi ra caahán tuhun yu tsihin nyíví tsicá vehe ñuhu ñuu Tiatira. Tan çatyí tsihin ra tyehen: “Tyehen catyí Sehe Nyoo, ra tsa caá tinuu tumaa caá nu cayú ñuhu. Tan tsaha ra caá tumaa caá caa bronce tsa xiñu xaan. ¹⁹ Yuhu nyehé yu tandíhi tsa javahá ndo. Tan tsitó yu tsa cuñí xaan ndo tsi nyíví. Tan tsitó yu tyin tsinú xaan iñi ndo tsi yu, tan jatyinyeé ndo tsi nyíví, tan cunyeé xaan iñi ndo. Tan tsitó yu tyin cuaha ca tsa vaha javahá ndo vityin tan ñavin ca nu quitsí tsi. ²⁰ Maa tyin iyó juhva tsa cuñí yu cahan yu tsihin ndo: Nyehé yu tyin tsahá ndo ndatu tsi [ñaha tsa javahá tumaa javahá] ña Jezabel [tsa tsicoó tahañ tsanaha]. Ña ican jacuaha tsi ndo, catyí ña tyin Nyoo tsahá tuhun caahán ña, maa tyin jandaví ñaha ña tsi nyíví tsa jahá tyiñu tyiñu yu tsihin tuhun jacuahá ña. Tyin catyí ña tyin ñavin cuatyí cuví tsa coo iin rayíi tsihin ñaha o iin ñaha tsihin rayíi tun ña tindahá ñi. Tan jacuahá ña tyin cuví catsi ñi nyayu tsa jamañí nyíví tsi tsitoho. ²¹ Yuhu tsa ndatú xaan yu tsa nasama ña cuhva iyó ña, maa tyin ña cuñí ña javaha ña can. Ña cuñí ña jandíhi ña tsa tsicá nuu ña tsihin rayíi. ²² Tan vityin cua quihin cuehe tsi ña tan ña cua cuvi nduvita ña. Tan nyíví javahá tsa caquiñí tsihin ña, cua cuhva yu tundoho nyehe

ñi tatum ña ndu uvi iñi ñi tsa javahá ñi. ²³ Tan cua cahñi yu sehe ña. Tacan tan cua coto tandihí nyiví tsicá vehe ñuhu, tyin yuhu tsitó yu tandihí tsa tsicá iñi ñi, tan tandihí tsa iyó añima ñi. Tan tsa intuhun intuhun nyooho cua cuhva yu tsa taahán tsi tsi ndo tsa cuenda tsa javahá ndo. ²⁴ Maa tyin tandihí ca nyooho tsa iyó ñuu Tiatira, nyooho tsa ña naquihín cuenda cuhva jacuahá ña, ndi ña javahá ndo tsa catyí nyiví tyin cuví tuhun xeehe cuenda nu ña vaha, ña tyaá yu inga tsa yí siqui ndo. ²⁵ Maa tyin jañihi ndo javaha ndo tsa vaha nda cuanda quitsi nyico yu. ²⁶ Tan nyooho tsa jaha canaa tsi nu ña vaha, tan javahá ndo cuhva cuñí yu nda cuanda nu ndihí tuhun, cua cuhva yu ndatu tsi ndo tsa cundaca ñaha ndo tsi nyiví iyó nu ñuhu ñayiví ihya. ²⁷ Tumaa tsahá Jutu yu ndatu tsi yu tsa cundaca ñaha yu, tacan cua cundaca ñaha ndo. Tan tsihin iin tatum tsa cuví caa cua tatsi tuñi ndo tsi nyiví. Tan cua tahvi cuatyí ndo tsi ñi tumaa tsa tahví cuatyí yo quisi. ²⁸ Tan cua cuhva yu tiñuu cahnu tsa caná tsa naa ca coo tsihin ndo. ²⁹ Nyooho tsa iyó soho, tyá soho ndo tsa caahán Tatyi Ii Nyoo tsihin nyiví tsicá vehe ñuhu.”

3

*Tsa tsaha cuenda ra Jesucristo tsi nyiví tsicá
vehe ñuhu ñuu Sardis*

¹ ’Jacuhun tucu tutu tsi ra caahán tuhun yu tsihin nyiví tsicá vehe ñuhu ñuu Sardis. Tan catyi tsihin ra tyehen: “Tyehen catyí ra tsa iyó tsa utsa tatyí ii Nyoo tan tsa utsa tiñuu: Yuhu nyehé yu tandihí tsa javahá ndo. Tan vasu catyí nyiví tyin

nyito ndo, maa tyin tsa cuenda yuhu, tsa tsihí ndo.
² Jaha cuenda vaha ndo tsa vaha tsa iyó luxu ca tsi
 ndo. Tyin coto ndihí ndihí tuhun yu nu yucú ndo.
 Nyehé yu tyin nuu Nyoo ña vaha maa tsa javahá
 ndo. ³ Ndūcuhun iñi ndo tsa vaha tsa cutuhvá ndo.
 Cuanyicun ndo can, tan násama ndo cuhva iyó
 ndo. Tyin tun ña naquihin vaha ndo tsa vaha, sana
 iñi ndo tan cua quitsi yu nu yucú ndo, tumaa iin
 ñasuhu. ⁴ Maa tyin iyó juhva nyoooho, nyívi Sardis,
 tsa ña janyahyuú jahma; ña javahá ndo tsa caquiñi
 cuví can. Tan juvin nyoooho cua cunditsi jahma
 cuitsin tsihin yu, tan cua caca ndo tsihin yu, tyin
 tacan taahán tsi tsi ndo. ⁵ Tan nyoooho tsa cua cuvi
 jaha canaa tsi nu ña vaha, cua cunditsi ndo jahma
 cuitsin tsihin yu. Tan ña cua janaa yu sívi ndo
 nu libru nu nyecú sívi tandihí nyívi cua coo nyito
 tsihin Nyoo. Tan cua catyi yu tsihin Jutu yu, tan
 ángel ra tyin nacotó yu tsi ndo. ⁶ Nyoooho tsa iyó
 soho, tyáa soho ndo tsa caahán Tatyi Ii Nyoo tsihin
 nyívi tsicá vehe ñuhu.”

*Tsa tsahá cuenda ra Jesucristo tsi nyívi tsicá
 vehe ñuhu ñuu Filadelfia*

⁷ Jäcuuhun tucu tutu tsi ra caahán tuhun yu tsihin nyívi tsicá vehe ñuhu ñuu Filadelfia. Tan catyi tsihin ra tyehen: “Tyehen catyí ra ii, ra nditsa, ra yihí ndaha ndaha tucu ra rey David, ra tsa nuñá yuvehe tan ndi intuhun nyívi tan ña cuvi nacasi. Tan tatum nacasi ra, ndi intuhun ñi tan ña cuvi nuña ñi. Tyehen catyí ra: ⁸ Yuhu nyehé yu tandihí tsa javahá ndo. Tan nuñá yu iin yuvehe tsa cuenda ndo tan yoñi cuví nacasi itsi, [tyin tsahá yu tsa cahan ndo tuhun Nyoo tsihin nyívi, tan yoñi cuví

casí tsi ndo]. Tan iyó luxu tunyee iñi tsi ndo, tan tyáá yahvi ndo tsa caahán yu, tan ña catyí ndo tyin ña nacotó ndo tsi yu. ⁹ Tan nyíví yihí cuenda nu ña vaha, ñi vatya, ñi catyí tyin nyíví Israel cuví ñi, maa tyin ñavin nyíví Israel cuví ñi tsitsi añima ñi; cua jacuiñi tsítí yu tsi ñi nuu ndo, tyin tacan tan coto ñi tyin yuhu cuñí yu tsi ndo. ¹⁰ Tyin cunyeé xaan iñi ndo tumaa catyí yu tsihin ndo tyin cunyee iñi ndo. Tan yacan cuenda cua jaha cuenda yu tsi ndo tan nduve náá cua tahan ndo quíví cua jaquitsi yu tundoho cahnu siquí tandihí nyíví, tyin cua nducu cuhva yu tsi tandihí ñi iyó nu ñuhu ñayíví. ¹¹ Yatyi cua quitsi yu nu yucú ndo. Jaha cuenda vaha ndo cuhva iyó ndo, tyin coto quinyaa nyíví tsa vaha tsa cua ñihí ndo. ¹² Nyooho tsa cua cuvi jaha canaa tsi nu ña vaha, cahnu tyiñu Nyoo cua jaha tyiñu ndo. Cua cuhva yu tsa cuví ndo tumaa ticoo tsa nyisó vehe ñuhu Nyoo yu. Tan ña cua quita maa ndo nu nyaá Nyoo. Tan cua tyaa yu siví Nyoo yu tsi ndo, tan siví ñuu Nyoo yu, ñuu Jerusalén tsaa tsa cua quee nda andíví, tan juvin ñi cua tyaa tucu yu siví tsaa yu tsi ndo. ¹³ Nyooho tsa iyó soho, tyaa soho ndo tsa caahán Tatyi Ii Nyoo tsihin nyíví tsicá vehe ñuhu.”

*Tsa tsahq cuenda ra Jesucristo tsi nyíví tsicá
vehe ñuhu ñuu Laodicea*

¹⁴ 'Jacuhun tucu tutu tsi ra caahán tuhun yu tsihin nyíví tsicá vehe ñuhu ñuu Laodicea. Tan catyi tsihin ra tyehen: “Tyehen catyí ra tsa nditsa, ra jandaá tsa caahán ra tyin javaha ra, tan tsihin ra javahq Nyoo tandihí maa tsa iyó: ¹⁵ Yuhu nyehé yu tandihí tsa javahá ndo. Tan cuví ndo tumaa

ndutya tsa ña vitsin tan ndi ña ihñi, tyin ndi ña tsinú vaha iñi ndo tsiyu, tan ndi ña jandihí tucu ndo tsa tsinú iñi ndo tsiyu. Vaha ca tsa tsinu vaha iñi ndo tuhun caahán yu, o jandihí cuii ndo tsa tsinú iñi ndo tsiyu. ¹⁶ Maa tyin tsa cuenda tsa cuví ndo tumaa ndutya vixin ñi ndi ña vitsin tan ndi ña ihñi ndo, cua ndutsan yu tsi ndo. ¹⁷ Tyin nyoooho catyí ndo tyehen: ‘Yuhu cuca xaan yu, vaha xaan iyó yu. Nduve náa cumañi tsiyu,’ catyí ndo. ¿A ña jahá ndo cuenda tyin cuiihya cuñi ndo nyehé ndo tundoho tsitsi añima ndo, ndaahvi ndo, cuaa ndo, tan tandíi ndo tsitsi añima ndo? ¹⁸ Yacan cuenda tsahá cuenda yu tsi ndo tyin tsi maa yu jata ndo xuhun cuaan tsa cayu tan naq tsa nyahyu tsi, tyin tacan tan nducuca ndo. Tan jata ndo jahma cuitsin nu nyaá yu tyin cunditsi ndo, tyin tacan tan ña cua nducahan ca nuu ndo tsa tandíi ndo. Tan jata ndo numeri quihví tinuu ndo tyin tacan tan cuví nyehe ndo. ¹⁹ Yuhu tsahá cuenda yu tan tatsí tuñi yu tsi tandihí nyiví tsa cuñi xaan yu. Yacan cuenda catyí yu tsihin ndo: Jandu iin ndo iñi ndo tsihin tsa nii iñi añima ndo tan javaha ndo tsa vaha. ²⁰ ¡Nyéhe jihna! Yuhu nyaá yu yuvehe tan cañi ndaha yu. Nyiví tsa cua cuñi ndusu yu, tan nuña ñi yuvehe, cua quihví yu tan cuxiñi yu tsihin ñi. Tan maa ñi cuxiñi ñi tsihin yu. ²¹ Cua cuhva yu tsa cunyecu ndo tsihin yu nu ndacá ñaha yu tatuñ cuví jaha canaa ndo tsi nu ña vaha. Tumaa tsa jaha canaa yu tsi nu, tan vityin nyaá yu tsihin Jutu yu nu ndacá ñaha ra. ²² Nyoooho tsa iyó soho, tyaa soho ndo tsa caahán Tatyi Ii Nyoo tsihin nyiví tsicá vehe ñuhu” —catyí ra Jesucristo.

4*Tsa cuví nda gloria*

¹ Tsa yah_q can, tan nyehe_q yu ticoho iin yuvehe nda andiv_i. Tan tsin_i yu ndusu tsa caahán jihna tsihin yu, ndusu tumaa ndusu trompeta, tan catyí tsi tsihin yu:

—Nd_qa nyehe tan janaha yu tsi un tsa cua cuvi nu cuahán ca tsi —catyí ndusu can tsihin yu.

² Tan juvin ñi cuhva can tan tuv_i iñi yu tsa nyaá Tatyi Ii Nyoo tsihin yu. Tan nyehe_q yu nyaá iin tyayu nda gloria. Tan nu tyayu can nyaá iin ra nyaá. ³ Tan nuu ra tsa nyaá nu tyayu can, xiñu tsi tumaa xiñu yuu vaha tsa nañí jaspe tan tumaa xiñu yuu cornalina. Tan tanii cahnu yuhu tyayu can tsinú nduvi coo cuiya, tan xiñu t_i tumaa xiñu yuu vaha tsa nañí esmeralda. ⁴ Tan nyehe_q yu nyecú oco cumi ca tyayu nu nyecú oco cumi ra tsahnu naha ra, tsin_u nduvi tyayu can nu nyaá tyayu tsa nyaá mahñu can. Nditsi ra naha jahma cuitsin. Tan yihí corona xuhun cuaan jiñi intuhun intuhun ra naha. ⁵ Tan nu nyaá tyayu tsa nyaá mahñu can, quitá tatsa tan ñihi cuvaa tan ñihi caahán savi. Tan cayú utsa ñuhu ityi nuu tyayu can, tan tsa utsa ñuhu can cuví tsa utsa tatyi ii Nyoo. ⁶ Tan ityi nuu tyayu can iyó tucu iin tsa caá tumaa caá ndutya ñuhu, tan xiñu xaan can tumaa xiñu yutyi.

Nii canduvi yuhu tyayu can tan mahñu tyayu can, nyecú cumi tsa nyito. Tan cuaha xaan tinuu tsa nyito can iyó, ityi nuu can tan ityi tsata can. ⁷ In tsa nyito can caá can tumaa caá ndicaha. Tan tsa tsinu uvi tumaa caá indiqui lee. Tan tsa tsinu

uñi, tumaa caá nuu rayii caá nuu can. Tan tsa tsinu cumi tumaa caá tasu tsa cuahán ndavá. ⁸ Tan iyó iñu nditsin tsa intuhun intuhun tsa nyito can. Tan tanii cahnu tsi nyecú tinuu tsi, tahan ñi ityi tsata tan ityi tsitsi tsi. Tan ña jandihí tsi tsa caahán tsi tyehen nduvi tan ñiñu:

Ra ii cuví un; ra ii cuví un; ra ii cuví un.

Jutu Mañi yu, Nyoo, iyó tandihí tunyee iñi tsi un.

Tacan ñi iyó maa un, juvin un cuví Nyoo nda tsanaha tan vityin, tan juvin un cua quitsi.

⁹ Tan jacahnú tsa cumi tsa nyito can tsi Nyoo, tan nacuhvá tsi naха tsi tyahvi nyoo tsi ra nyaá nu tyayu can, ra tsa iyó tandihí tyembu. Tan tahan ñi tsaha tsa javahá tsi naха tsi tacan, ¹⁰ tsa oco cumi ra tsahnu can naха ra tsicuiñi tsiti ra naха tan jacahnú ra naха tsi ra iyó tandihí tyembu. Tan tsaquín ra naха corona ra naха nu nyaá tyayu can. Tan catyí ra naха:

¹¹ Jutu Mañi ndi, Nyoo ndi cuví un.
Yooho taahán tsi jacahnú ndi.

Tan taahán tsi tsi un tsa cundaca ñaha un.

Tyin maa un javahá tandihí tsa iyó.

Tan tsa cuenda tsa iyó iñi maa un, tan tsicoo tandihí tsa iyó, catyí ra naха.

5

Nu nyehé ra Juan iin tutu tan Mbee Ticatyi Luhlu tsa cuví ra Jesucristo

¹ Tacan tan nyehé yu tyin ra tsa nyaá nu tyayu can ndahá ra iin tutu tsihin ndaha cuaha ra. Tan yihi tuvi tutu can tan nyaá letra ityi nuu tan ityi tsata can. Ndasí tsi tsihin utsa sellu. ² Tan nyehé yu

iin ángel tsa nyee xaan. Tan caná tsaa ra tan catyí ra:

—¿Yóo taahán tsi nacaní tutu ihyá tan jocon sellu ihyá? —catyí ra.

³ Maa tyin ndi intuhun tsa iyó andívì tan nu ñuhu ñayívi, tan tsitsi ñuhu, tan cuví nacaní tutu can. Nduve maa náa cuví nyehe nuu tsi. ⁴ Tan tsacú xaan yu, tsa tsito yu tyin yoñi maa cuví nacaní tutu can tan cuví cahvi, tan cuví nyehe nuu tsi. ⁵ Tacan tan catyí iin ra tsahnu tsa nyaá can tsihin yu:

—Ña vacu ca un. Tyin ra cuví Ndicaha [o cuñí tsi catyi, ra ndacá ñaha], ra cuví tata ra Judá, tan tata ra rey David, ra ican jahá canaa tan juvin ra cua nacaní tutu can tan jocon tsa utsa sellu tsa ndasí tutu can —catyí ra.

⁶ Tacan tan mahñu tyayu can tan mahñu tsa cumi tsa nyito can, tan mahñu ra tsahnu can na ha ra, nyehe yu nyaá nyityi iin Mbee Ticatyi Luhlu. Tan caá tì tumaa caá iin mbee tsa tsahñi nyívi tan jamañi ñi. Tacan caá tì. Tan iyó utsa ndíqui tì tan nyecú utsa tinuu tì. Tan tinuu can cuví tsa utsa tatyi ii tsa jacuhún Nyoo taníi cahnu nu ñuhu ñayívi. ⁷ Tan ra Mbee Ticatyi Luhlu can tsahñan ra nu nyaá ra nyaá nu tyayu can tan quihín ra tutu tsa ndahá ra can nu ndaha cuaha ra. ⁸ Cuhva tsa quihín ra tutu can, tandíhi tsa cumi tsa nyito can tan tandíhi tsa oco cumi ra tsahnu can tsicuiñi tsiti ra na ha nuu ra. Tan tsa intuhun intuhun ra tsahnu can na ha ra ndahá ra na ha arpa tsa iyó cuerda tumaa iyó cuerda nuu guitarra. Tan tsitu cutu tsitsi copa xuhun cuaan ndahá ra na ha. Tan cutu can cuví tandíhi tsa tsicán tahvi nyívi yíhi cuenda

Nyoo. ⁹ Tan tsitá ra naha iin yaa tsaa, tan catyí ra naha:

Yooho cuví ra taahán tsi quihin tutu ihya tan jocon un tsa utsa sellu tsa ndasí itsi.

Tyin tsahñi nyívi tsi un. Tan tsihin niñi un jatá un tsi ndi tyin coo vaha ndi tsihin Nyoo.

Tan cuví ndi nyívi ñuu nyihi tan ñuu nahnu tsa iyó tanii cahnu nu ñuhu ñayívi, nyívi caahán siín siín yuhu, tan nyívi siín siín tata.

¹⁰ Tsahá un tsa cuví ndi rey tan jutu tsa cuenda Nyoo Jutu yo.

Tan cua cundaca ñaha ndi tsi nyívi iyó nu ñuhu ñayívi, catyí ra naha, tsitá ra naha.

¹¹ Yahá can tan tsiñi yu ndusu tan nyehé yu nyecú cuenda millón ángel tanii canduvi nu nyecú ra tsahnu can naha ra, nu nyecú tsa cumi tsa nyito, tan xiin tyayu can. ¹² Tan ñihi caahán ángel can naha ra, tan catyí ra naha:

Ra Mbee Ticatyi Luhlu tsa tsahñi nyívi, juvin ra taahán tsi cundaca ñaha, tan naquihin cuenda tsa cuca.

Tan juvin ñi ra taahán tsi naquihin cuenda tsa tsiñi tuñi tan tandíhi tunyee iñi.

Na jacobnu yo tsi ra tan na jacobnu tandíhi nyívi tan tandíhi tsa iyó tsi ra, tyin cahnu xaan cuví ra, catyí ángel can naha ra.

¹³ Tan tsiñi tucu yu tsa caahán tandíhi tsa javaha Nyoo; tandíhi tsa iyó andiví, tan nu ñuhu ñayívi, tan tsitsi ñuhu, tan tsitsi ndutya ñuhu; tan catyí tsi naha tsi:

Cahnu xaan cuví ra tsa nyaá nu tyayu.

Cahnu xaan cuví ra Mbee Ticatyi Luhlu.

Tan tunyee iñi tsa iyó tsi ra naha ña cua cundihi maa tsa iyó tsi.

Tan taahán tsi tsa jacobnu yo tan tyaa yahvi yo tsi ra naha tacan ñi maa —catyí tandihí tsa javahá Nyoo.

14 Tan catyí tsa cumi tsa nyito can:

—¡Na cuvi tsi tacan! —catyí tsi naha tsi.

Tan tsicuiñi tsiti tsa oco cumi ra tsahnu can naha ra tan jacobnú ra naha tsi ra tsa ña cua cundihi maa.

6

Nu jocon ra Jesucristo tsa utsa sellu tsa ndasi tutu can

1 Tacan tan nyehe yu nu jocon ra Mbee Ticatyi Luhlu can sellu tsa jihna ñi tsitsi tsa utsa sellu can. Tan tsiñi yu ndusu iin tsa nyito can tan ndusu tsi cuví tumaa nu caahán savi, tan catyí tsi:

—¡Naha, tan nyehe un! —catyí tsi tsihin yu.

2 Tacan tan nanyehe yu tan nyehe yu iin cuayu cuitsin, tan ra yosó tsi ti ndahá ra iin nduva. Tan ñihí ra iin corona yihí jiñi ra, yacan jahá canaa ra, tan ndi nyaá ca cua jaha canaa ca ra.

3 Tan tsa jocon ra Mbee Ticatyi Luhlu can tsa tsinu uvi sellu can, tsiñi yu tsa caahán inga tsa nyito can tan catyí tsi:

—¡Naha, tan nyehe un! —catyí tsi tsihin yu.

4 Tan quitá iin cuayu cuaaha. Tan ra tsa yosó tsi ti ñihí ra ndatu tsa quinyaa ra tsa taxin iyó nu ñuhu ñayivi, tyin tacan tan cahñi tahan nyivi tsi ñi. Tan ñihí ndihí ra iin mityi cahnu cundahá ra.

5 Tan tsa jocon ra Mbee Ticatyi Luhlu can tsa tsinu uñi sellu can, tsiñi yu tsa caahán inga tsa nyito can tan catyí tsi:

—¡Naha, tan nyehe un! —catyí tsi tsihin yu.

Tan nanyehe yu, tan nyehe yu iin cuayu tuun. Tan ra yosó tsi ti, ndahá ra iin ticatya. **6** Tan tsiñi yu caahán iin ndusu mahñu tsa cumi tsa nyito can, tan catyí tsi:

—Tumaa tyahví nyíví tsi iin musu tsa iin quíví, tacan yahvi tsa intuhun ñi kilu nuñi. Tacan tucu ñi tsa uñi kilu cebada. Tan ña jatíví ndo acetye tan vinu —catyí ndusu can.

7 Tan tsa jocon ra Mbee Ticatyi Luhlu can tsa tsinu cumi sellu can, tsiñi yu tsa caahán intuhun ca tsa nyito can, tan catyí tsi:

—¡Naha, tan nyehe un! —catyí tsi tsihin yu.

8 Tan nanyehe yu, tan nyehe yu iin cuayu cuaan. Tan ra yosó tsi ti nañí ra Tuhun Tsiihí. Tan tsata ra can vatsí inga ra tsa nañí Nu Yucú Añima Ndiyí. Tan ñihí ra naha tunyee iñi tsa cahñí ra naha tsa cuaha nyíví iyó nu ñuhu ñayíví. Tyin tsitsi tsa sava nyíví iyó nu ñuhu ñayíví, cua cahñí ra naha sava ñi. Tan cua cahñí ra naha tsi ñi tsihin tsa jacoo ra naha cuatyí, tan tsihin tama, tan tsihin cuehe, tan tsihin quítí xaan iyó nu ñuhu ñayíví.

9 Tan tsa jocon ra Mbee Ticatyi Luhlu can tsa tsinu uhun sellu can, nyehe yu xuu altar. Tan ican yucú añima nyíví tsa tsihí tsa cuenda tsa jacoto ñi tuhun Nyoo. **10** Tan caná tsaa ñi tan catyí ñi tyehen:

—Jutu Mañi ndi, ra ii cuví un, tan jandaá un tandihí tsa caahán un tyin javaha un. ¿Ama cua

tatsi tuñi un tsi nyiví tsa tsahñi tsi ndi tsa cuenda un? —catyí ñi.

¹¹ Tacan tan ñihij intuhun intuhun ñi jahma cuitsin tsa cunditsi ñi. Tan catyí ra tsihin ñi na quitatu ñi tan cuatu ñi juhva ca quiví, nda cuanda cahñi nyiví tsi tandihí ca ñi tsa jahá tyiñu tyiñu ra Cristo, ñi tsa taahán tsi cúa tumaa tsihij tucu maa ñi.

¹² Tan tsa jocon ra Mbee Ticatyí Luhlu can tsa tsinu iñu sellu can, nyehe yu tyin ñihij xaan taán. Tan ndutuun ñicanyii tumaa tuun jahma nyiví iyó tucuihya iñi. Tan yoo nducuaaha tsi tumaa cuaaha niñi. ¹³ Tan tiñuu cucoyo tsi nu ñuhu ñayiví tumaa cucoyó tsiti yutya yutun tatum ñihij yahá tatyí. ¹⁴ Tan andiví tsiquihí tuvi tsi tumaa tyihí tuví yo iin ndaha tutu. Tan tandihí yucu tan ñuhu nyihij tsa cayucú mahñu ndutya ñuhu nasamä nu cayucú tsi. ¹⁵ Tan tandihí rey tsa iyó nu ñuhu ñayiví tsihin ra nahnu naha ra, tan ra cuca naha ra, tan ra cuví ityi nuu tsihin andaru naha ra, tan ra iyó xaan tunyee iñi tsi naha ra, tan tandihí nyiví tsa cuví musu, tan ñi tsa ñavin musu cuví, quihví xeehe ñi tsitsi yavi yuu tan tyañu cava tsa iyó yucu nahnu. ¹⁶ Tan catyí ñi tsihin yucu can tan tsihin yuu can:

—Cucoyo ndo tsata ndi, na ña nyehe ra nyaá nu tayu can tsi ndi tan coto tatsi tuñi ra Mbee Ticatyí Luhlu can tsi ndi.

¹⁷ 'Tyin tsa tsaq quiví cahnu tsa cua tatsi tuñi ra tsi ndi, tan yoñi cunyee iñi can —catyí ñi.

¹ Tsa yahq can tan nyehe yu nyecú cumi ángel tsa ndihi tsa cumi tutun ñuhu ñayivi ityi nu tuhvá tatyi queé tyin tacan tan ña yaha tatyi nu ñuhu ñayivi tan nu ndutya ñuhu tan nu yutun. ² Tan nyehe tucu yu queq inga ángel, ityi nu caná ñicanyii, tan ndahá ra tuñi Nyoo nyito. Tan canq tsaa ra tsí tsa cumi ángel tsa ñihi ndatu tsa jativi nu ñuhu ñayivi tan nu ndutya ñuhu. Tan catyí ra tsihin ra naha:

³ —Ña jativi naha ndo nu ñuhu ñayivi, ndi nu ndutya ñuhu, tan ndi nu yutun tsa ndi cumañi ca janaha ndi yóo nyivi cuví musu Nyoo, tyin cua tyaa ndi tuñi nutyaan intuhun intuhun ñi —catyí ángel can.

⁴ Tan catyí ra tsini yu tyin cientu uvi xico cumi mil cuví nyivi Israel tsa tsinyaq tuñi can. ⁵ Utsi uvi mil nyivi tata ra Judá tsinyaq tuñi, tan utsi uvi mil nyivi tata ra Rubén, tan utsi uvi mil nyivi tata ra Gad, ⁶ tan utsi uvi mil nyivi tata ra Aser, tan utsi uvi mil nyivi tata ra Neftalí, tan utsi uvi mil nyivi tata ra Manasés, ⁷ tan utsi uvi mil nyivi tata ra Simeón, tan utsi uvi mil nyivi tata ra Leví, tan utsi uvi mil nyivi tata ra Isacar, ⁸ tan utsi uvi mil nyivi tata ra Zabulón, tan utsi uvi mil nyivi tata ra José, tan utsi uvi mil nyivi tata ra Benjamín. Tandihi ñi can tan tsinyaq tuñi Nyoo tsí ñi.

Nu nyehe ra Juan tsí nyivi nditsí jahma cuitsin

⁹ Tsa yahq can tan nyehe yu yucú cuaha nyivi. Tan yoñi maa cuví nacahvi tsi ñi, tyin cuaha xaan ñi. Yucú nyivi queq tandihi ñuu nyihi tan ñuu nahnu tsa iyó tanii cahnu nu ñuhu ñayivi. Tan yucú nyivi caahán siin siin yuhu. Tan yucú nyivi siin siin tata. Tan nyecú ñi nuu ra nyaá nu tyayu, tan nuu

ra Mbee Ticatyi Luhlu. Nditsí ñi jahma cuitsin. Tan ndahá ñi ndaha ndicaha. ¹⁰ Tan tandihí ñi caná tsaa ñi tan catyí ñi:

Nyoo Jutu yo, ra nyaá nu tyayu, tan ra Mbee Ticatyi Luhlu,

juvin ra na ha jacacu tsi yo —catyí ñi caná tsaa ñi.

¹¹ Tan tandihí ángel na ha ra nyecú ra na ha tanii canduvi nu nyaá tyayu, nu nyecú ra tsahnu na ha ra, nu nyecú tsa cumi tsa nyito. Tan tsicuiñi tsiti ra na ha tan tsaquin ra na ha nuu ra na ha nda nu ñuhu ityi nuu ra nyaá nu tyayu can. Tan jachahnú ra na ha tsi ra tyin juvin ra cuví Nyoo. ¹² Tan catyí ra na ha:

Tyehen taahán tsi jachahnú ndi tsi un, Jutu Mañi ndi tyin iyó xaan tsa tsiñi tuñi tsi un:

Nacuhvá xaan ndi tyahví nyoo tsi un.

Tan jachahnú ndi tsi un tyin iyó xaan tunyee iñi tsi un, Nyoo Jutu ndi.

Tan na cuvi tsi tacan tandihí tyembu, catyí ra na ha.

¹³ Tacan tan tsicä tuhun iin ra tsahnu can tsi yu tan catyí ra:

—¿Yóo nyiví cuví ñi nditsí jahma cuitsin ihya?

¿Tan ndáa ityi quee ñi? —catyí ra.

¹⁴ Tan catyí yu tsihin ra:

—Maa un tsitó, tata.

Tan catyí ra tsihin yu:

—Nyiví ihya cuví ñi nyehé tundoho cahnu. Maa tyin nacatyä ñi jahma ñi tsihin niñi ra Mbee Ticatyi Luhlu tan nducuitsin tsi. ¹⁵ Yacan cuenda nyecú ñi ityi nuu tyayu nu nyaá Nyoo. Tan jahá tyiñu ñi tyiñu ra nduvi tan niñu tsitsi vehe ñuhu ra. Tan ra tsa nyaá nu tyayu can jahá cuenda ra tsi ñi tsihin

tsa nyaá ra tsihin ñi. ¹⁶ Tan ña cua cusoco ca ñi, ndi ña cua na ityi ca iñi ñi. Ña cua cahmi ca ñicanyii tsi ñi. Tan ndi ña tuñu ca cuñí ñi tsihin tsa ihñi. ¹⁷ Tyin ra Mbee Ticatyi Luhlu tsa nyaá mahñu tyayu can cua jaha cuenda ra tsi ñi, tumaa jahá cuenda yo mbee. Tan cua cundaca ra tsi ñi nu coho ñi ndutya tsa tsahá tsa coo cuii ñi. Tan Nyoo cua nacuhva ra tandihí ndutya nuu ñi —catyí ra tsihin yu.

8

*Nu jocon ra Jesucristo tsa tsinu utsa sellu tan nu
quitá iin ángel tsihin iin cuu xuhun cuaan*

¹ Tan tsa jocon ra Mbee Ticatyi Luhlu tsa tsinu utsa sellu tsa ndasí tutu can, ndutaxin nda andiví tumaa sava hora.

² Yahá can tan nyehé yu nyecú utsa ángel ityi nuu Nyoo. Tan intuhun intuhun ra na ha quihiñ cuenda ra na ha iin trompeta. ³ Yahá can tan tsaaq inga ángel tsa ndahá iin cuu xuhun cuaan. Tan tsinyaa nyityi ra ityi nuu altar can. Tan quihiñ cuenda ra cuaha xaan cutu, tyin cuhva cuenda ra itsi iin caa ñi tsihin tsa tsicán tahvi nyíví tsi Nyoo nuu altar xuhun cuaan tsa nyaá ityi nuu tyayu Nyoo. ⁴ Tan quitá yuhma cutu tan yuhma tsa tsicán tahvi nyíví tsi Nyoo ndaha ra, tan cuahán yuhma can nu nyaá Nyoo. ⁵ Tacan tan ángel can quihiñ ra cuu can tan jacutuñ ra can tsihin tuun ñuhu tsa quitá nu altar can. Tan tyoso ra can nu ñuhu ñayíví. Tan quitsahá caahán savi, tan iyo cuví. Tan ñihi tatsa, tan quitsahá taán.

Nu tíví ángel na ha ra trompeta

6 Tacan tan tsa utsa ángel tsa ndahá trompeta can, ndatú ra naha tsa tíví ra naha can.

7 Tsa tíví iin ángel can trompeta tsa ndahá ra, quitsahä cuún savi tan cucoyó yuu savi, ñihi cayú ñuhü tan sacá nuu niñi tsihin can. Tan tsa yatyin cayú sava ñuhu ñayívi, tan tsa yatyin tucu sava cuhva nyaá cuhu tsitsa tan tandihí cuhva nyaá cuhu cuii.

8 Tan tsa tíví tsa tsinu uvi ángel can trompeta tsa ndahá ra, nyehé yu cayú tumaa iin yucu cahnu. Tan nacavä can mahñu ndutya ñuhu. Tan tsa yatyin sava ndutya ñuhu can nanduví tsi niñi.

9 Tan tsa tandihí quítí iyó tsitsi ndutya ñuhu can tsihí tsa yatyin sava tí naha ti. Tan tahví cuatyí tucu tsa yatyin sava yutun ndoo cuaha tsa iyó tsitsi ndutya ñuhu can.

10 Tan tsa tíví tsa tsinu uñi ángel can trompeta tsa ndahá ra, nacavä iin tiñuu cahnu. Cayú tsi tumaa cayú yíti. Tan nacavä tsi siquí tsa yatyin ña sava yutya nahnu tan tsa yatyin ña sava nu ndohyo.

11 Tan siví tiñuu cahnu can cuví Ajenjo. Tan tsa yatyin ña sava ndutya tsa iyó, ndu uvä tsi tumaa tsa uva xaan ajenjo can. Tan cuaha xaan nyívi tsihí tyin tsihí ñi ndutya tsa ndu uvä can.

12 Tan tsa tíví tsa tsinu cumi ángel can trompeta tsa ndahá ra, ndu naq tsa yatyin ña sava ñicanyii, tan tsa yatyin ña sava yoo, tan tsa yatyin ña sava tiñuu ndunaq tsi naha tsi. Tan tsa cuenda tsa ndunaq juhva ñicanyii, ndunaq nu ñuhu ñayívi cumi hora tsa iin iin nduvi. Tan tsa cuenda tsa tíví juhva yoo tan tiñuu, ña ndunditsín maa nu ñuhu ñayívi cumi hora tsa iin iin tsacuaa.

13 Yahaq can tan nyehé yu iin ángel ndavá ra mahñu andívì tan tsíñi yu tsa caahán ra. Tsihin tsa ñihí ndusu ra catyí ra:

—¡Ndahvi nyívì iyó nu ñuhu ñayívì tsa cua tívì tsa uñi ca ra ángel naha ra trompeta tsa ndaha ra naha! —catyí ángel can.

9

1 Tacan tan tsa tívì tsa tsinu uhun ángel can trompeta tsa ndahá ra, nyehé yu queé iin tiñuu ityi andívì. Tan nacavá can nu ñuhu ñayívì. Tan quihín cuenda can ndaha tucu tsa cuenda yavi cunu tsa nduve maa nuu tsindíhi. **2** Tacan tan nuñä can yuhu yavi can. Tan quitá cuaha yuhma tumaa quitá yuhma tsitsi iin ono cahnu. Tan tyasi yuhma can nuu ñicanyii tan nasaçä nuu can tsihin tatyi. Tan ndunaq nu ñuhu ñayívì. **3** Tan tsitsi yuhma can quitá tica xama. Tan ndavaq tì naha tì nu ñuhu ñayívì. Tan ñihí tì naha tì ndatu tsa tyaa tì naha tì tsi nyívì tumaa tyaá tujuhma tsa iyó nu ñuhu ñayívì. **4** Quihín tì naha tì tuhun tyin na ña jatívì tì naha tì cuhu tsa iyó nu ñuhu ñayívì, ndi cuhu cuii, tan ndi yutun. Maa tyin na tyaa tì naha tì tsi nyívì tsa nduve tuñi Nyoo nyaá nutyaan. **5** Ña ñihí ndatu tì naha tì tsa cahñi tì naha tì tsi nyívì, tyin tyaa ñi maa tì naha tì tsi ñi. Tan quihí xico tì tsi ñi uhun yoo. Tan xico uhvi can uhvi tsi tumaa uhví nyívì tsa tyaá tujuhma. **6** Quívì can nyívì cua nanducu ñi tuhun tsiihí. Maa tyin ña cua nañihí ñi can. Tan vasu ndi maa cuñí ñi cíú ñi, tuhun tsiihí cua cunu tsi nuu ñi tyin ña cua cíú ñi.

7 Tica xama can caá tì tumaa caá cuayu tsa tsicá cuatyí. Tan jiñi tì naha tì yihí tsa caá tumaa caá

corona xuhun cuaan. Tan nuu t̄i naха t̄i caá tumaa caá nuu nyívì. ⁸ Tan ixi jiñi t̄i naха t̄i caá tumaa caá ixi jiñi ñaha. Tan nuhu t̄i naха t̄i caá can tumaa caá caa. Tan ñihí xaan cundatsán nditsin t̄i naха t̄i, tumaa cundatsán carreta cuayu cuaha tsa tsinú nu iyó cuatyi. ⁹ Tan juhma t̄i naха t̄i caá tumaa caá juhma tujuhma, tyin yihí iñu can. Tan tsihin can cua tyaa t̄i naха t̄i tsi nyívì tsitsi tsa uhun yoo. ¹⁰ Tan iyó iin nu cuví ityi nuu tsihin tica xama can naха t̄i. Tan nu ican cuví tatyi tsa ndacá ñaha yavi cahnu tan cunu tsa nduve maa nu tsindíhi. Tan tsa tsihin yuhu hebreo nañí nu Abadón. Tan tsihin yuhu griego nañí nu Apolión, tan cuñí tsi catyi: Nu Janaá.

¹² Tsa yahä iin tundoho, tan cumañi uvi taahan ca.

¹³ Tan tsa tivì tsa tsinu iñu ángel can trompeta tsa ndahá ra, tsiñi yu iin ndusu tsa quita tsitsi tsa cumi ndiqui tsa nyecú tutun altar xuhun cuaan tsa nyaá ityi nuu Nyoo. ¹⁴ Tan ndusu can caahán tsi tsihin tsa tsinu iñu ángel tsa ndahá trompeta can, tan catyí tsi:

—Ndätsi tsi tsa cumi ángel tsa nuuhñí yatiny yuhu yutya cahnu Eufrates —catyí ndusu can.

¹⁵ Tacan tan ndatsi ra tsi tsa cumi ángel can, tyin tsa ndatüxaan ra naха ora can, quívì can, yoo can, cuiya can, tyin cahñi ra naха tsi tsa yatiny sava nyívì iyó nu ñuhu ñayívì. ¹⁶ Tan tsiñi yu tyin uvi cientu millón andaru tsa yosó cuayu.

¹⁷ Tacan nyehé yu cuayu jahä Nyoo. Tan ra yosó cuayu can naха ra nyaá caa cuaaha, azu tan cuaan yiqui nyica ra naха. Tan jiñi cuayu ra naха caá

tumaa caá jiñi ndicaha. Tan tsitsi yuhu tì naha tì quitá ñuhu tan yuhma tan azufre. ¹⁸ Tan tsa yatyin sava nyiví iyó nu ñuhu ñayiví tsihí tsihin tsa uñi tsa quitá yuhu cuayu can naha tì: ñuhu tan yuhma tan azufre. ¹⁹ Tyin iyó tunyee iñi tsi tì naha tì tsitsi yuhu tì naha tì tan nu juhma tì naha tì. Tyin juhma tì naha tì caá tumaa caá coo tan nuu juhma tì naha tì caá tumaa caá jiñi coo. Tan tsihin yacan jañicueehé tì naha tì tsi nyiví.

²⁰ Maa tyin tandihí ca nyiví tsa ndoo, ñi tsa ña tsihí tsihin tundoho can, ña jandihí ñi tsa javahá ñi tsa ña vaha. Ndi tsa jacahnú ñi tatyí ña vaha tan ndi tsi tsitoho tsa tsinu tsihin xuhun cuaan, xuhun cuitsin, bronce, yuu, tan yutun: tsitoho tsa ña cuví nyehe, ndi ña tsiñí, ndi ña cuví caca. ²¹ Ndi ña jandihí ñi tsa tsahñí ñi nyiví, tan javahá ñi tsa tasi. Tan ñiñaha ña jandihí ñi tsa tsicá nuu ñi tsihin rayíi, tan rayíi ña jandihí ra naha tsa tsicá nuu ra naha tsihin ñaha vasu ndi maa ña tindahá ñi. Tan ña jandihí ñi tsa suhú ñi.

10

Ángel tsa ndahá libru luhlu

¹ Tacan tan nyehe yu inga ángel tsa iyó xaan tunyee iñi. Queé ra ityi andiví tan vatsí nuú ra tsitsi vico. Tan nyaá coo cuiya jiñi ra. Tan nuu ra xiñu xaan can tumaa xiñu ñicanyii. Tan tsaha ra caá tumaa nyaá nyityi ñuhu tsa cayú. ² Tan ndahá ra iin libru luhlu nuñá nuu tsi. Tan tsañí tsaha cuaha ra nu ndutya ñuhu tan tsaha satyin ra nu ñuhu ñayiví. ³ Tacan tan cana tsaa ra, tumaa taná ndicaha tsa cuxaán tì. Tan cuhva tsa cana tsaa ra, tsiñí yu utsa ndusu tumaa cuví nu caahán savi, tan

intuhun intuhun tsi caahán tsihin ndusu maa tsi.
⁴ Tsa yahá tsa tsíñi yu tsa utsa ndusu can, tan cua tyaa yu can nu tutu. Maa tyin tsíñi yu caahán iin ndusu nda andívì, tan catyí tsi tsihin yu:

—Naquihin xeehe tuhun tsa cahàn tsa utsa ndusu can. Tan ñia tyaa un can nu tutu —catyí ndusu can.

⁵ Tacan tan ángel tsa nyehé yu tsa tsañí nu ndutya ñuhu tan nu ñuhu ñayiví, jandaà ra ndaha cuaha ra ityi andívì. ⁶ Tan ángel can catyí ra:

—Na nyehe maa Nyoo ra ña cua cundiñi maa, ra tsa javahà andívì tan ñuhu ñayiví tan ndutya ñuhu tan tandihì tsa iyó nuu tsi tyin nduve ca tsa cucuee.

⁷ Tyin cuhva tsa cua quitsaha tìví tsa tsinu utsa ángel can trompeta tsa ndahá ra, cuhva can cua cundaa tuhun xeehe tsa catyi Nyoo tyin javaha ra, tumaa cahàn ra tsihin ra jahá tyiñu tyiñu ra, ra cuví ndusu yuhu ra —catyí ángel can.

⁸ Tan ndusu tsa quità andívì, tsa cahàn jihna tsihin yu, juvin tsi caahán tsihin yu tyehen:

—Cuaahan cuaquihin libru luhlu tsa nandica tsa ndahá ra ángel tsa tsañí nu ndutya ñuhu tan nu ñuhu ñayiví —catyí tsi.

⁹ Tacan tan tsahan yu nu nyaá ángel can tan tsicàñ yu libru luhlu can tsi ra, tan catyí ra tsihin yu:

—Juhun, cätsi itsi. Vixi xaan tsi cua cuvi tsitsi yuhu un, tumaa vixi ndutya ñuñu. Maa tyin cua ndu uva tsi tsitsi un —catyí ra tsihin yu.

¹⁰ Tacan tan quihìn yu libru luhlu tsa ndahá ra, tsatsì yu. Tsa ndi nyíí tsi tsitsi yuhu yu, vixi xaan tsi tumaa vixi ndutya ñuñu. Maa tyin tsa cocò yu

itsi, ndu uvä tsi tsitsi yu. ¹¹ Tacan tan catyí ra naha tsihin yu:

—Cuñí tsi tsa cahan nyico un inga tsaha tuhun tsa caahán Nyoo siquí nyiví tsa iyó ñuu nyihi tan ñuu nahnu, tan nyiví caahán siñ siñ yuhu, tan siquí ra cuví rey naha ra —catyí ra tsihin yu.

11

Nduvi ra tsa cuví tsandaa naha ra

¹ Tacan tan tsahä ra naha iin ndoo tsi yu. Caá tsi tumaa caá yutun tsa tuhvá yo tyihí cuhva tsihin. Tan catyí ra naha tsihin yu:

—Ndüvita tan tyihí cuhva un vehe ñuhu Nyoo tan altar ra, tan cahvi najava taahan nyiví jacahnú tsi ra tsitsi vehe can. ² Maa tyin ña tyihí cuhva un nuquehe vehe ñuhu can, tyin tsa cuenda nyiví inga ñuu cuví can. Cua vaca tsaha ñi nu ñuu ii tsitsi tsa uñi cuiya sasava. ³ Tan yuhu cua jacuhun yu uvi ra tsa cua cuvi tsandaa tan cahan tuhun yu tsitsi tsa mil uvi cientu uñi xico quiví. Tan cunditsi ra naha jahma tucuihya iñi.

⁴ Tan tsa nduvi tsandaa can cuví uvi yutun olivo tan uvi candileru tsa nyecú nu Jutu Mañi yo, ra ndacá ñaha nu ñuhu ñayiví. ⁵ Tan nyiví tsa cua cuñi jañicueehe tsi ra cuví tsandaa can naha ra, cua naa cuii nuu ñi. Tyin cua quita ñuhü yuhu ra naha, tan tsihin can cua cahmi ra naha tsi tandihí nyiví xaan iñi tsi ra naha. ⁶ Tan iyó ndatu tsi ra naha tsa casí ra naha nu cuun savi tandihí quivi tsa cua cuhva cuenda ra naha tuhun caahán Nyoo tsihin ra naha tsi nyiví. Tan iyó tucu ndatu tsi ra naha tsa jananduvi ra naha niñi ndutya. Tan iyó tucu ndatu tsi ra naha tsa janyehe ra naha

tundoho tsi nyiví iyó nu ñuhu ñayiví tsihin tandihí nuu cuehe. Tan cuví javaha ra naha yacan najava tsaha cuñi maa ra naha. ⁷ Maa tyin tsa cua ndihí cuhva cuenda ra naha tuhun Nyoo tsi nyiví, cua quita quiti xaan yavi cunu can, tan cua cañi tahan tí tsihin tsa nduvi taahan ra cuvi tsandaa can. Tan cua jaha canaa tí tsi ra naha. Tan cua cahñi tí tsi ra naha. ⁸ Tan cua cava cuñu ñuhu ra naha tsitsi calle ñuu nu tsahñi nyiví tsi Jutu Mañi yo tan tyaa ñi tsi ra nuu cruu. Tan cua cuvi ñuu can tumaa ñuu Sodoma tan ñuhu Egipto, [tsa cuenda tsa ña vaha tsa cua javaha nyiví ñuu can]. ⁹ Tan tsitsi tsa uñi quiví sasava, cua nyehe tandihí nyiví cuñu ñuhu ra naha; nyiví iyó tandihí ñuu nyihí, nyiví tandihí ñi tata, tan ñi caahán siin siin yuhu, tan ñi iyó ñuu nahnu, cua nyehe ñi cuñu ñuhu ra naha. Tan ña cua cuhva ñi tsa quihí xeehe cuñu ñuhu ra naha tsitsi ñuhu. ¹⁰ Tan sií xaan cua cuñí ñi tsa cuenda tsa cua cíu ra can naha ra. Tan nda cuanda cua jacuhun ñi regalo tsi tahan ñi tsa cuenda tsa sií cuñi ñi tsa cua cíu nduvi taahan rayíi tsa cahan tuhun Nyoo tsihin ñi. Tyin cuñi maa ñi tyin tsaha xaan ra naha tundoho tsi ñi. ¹¹ Maa tyin tsa cua yaha tsa uñi quiví sasava, Nyoo cua janandoto ra tsi ra naha, tan nduvita nyico ra naha inga tsaha. Tan tandihí nyiví tsa cua nyehe tyin cua nandoto ra naha, cua nayuhvi xaan ñi. ¹² Tan tsa yahá tsa tsihí ra naha tan nyehe yu nandoto ra naha, tan catyí iin ndusu ityi andiví tsihin ra naha:

—Naha ndo nyehe

Tacan tan nandaq̄ ra naha ityi andiví tsitsi vico. Tan nyehe nyiví xaan iñi tsi ra naha nu nandaq̄ ra naha. ¹³ Tan ñihí xaan taq̄n cuhva can. Tan

tsitsi ñuu can taní cuaha xaan vehe. Tsitsi tsa utsi utsi vehe, taní intuhun intuhun tsi. Tan tsihí utsa mil nyíví jahá tsa taqan can. Tan nyíví tsa ñia tsihí, jacaahnú ñi tsi Nyoo, ra nyaá andíví, tsa cuenda tsa yuuhví ñi.

¹⁴ Yacan cuví tundoho tsa tsinu uvi tsa nyehe nyíví, maa tyin tsa vatsí tsa tsinu uñi.

Nu tiví tsa tsinu utsa ángel trompeta tsa ndahá ra

¹⁵ Tan tsa tiví tsa tsinu utsa ángel can trompeta tsa ndahá ra, tsiñi yu ndusu ñihi xaan ityi andíví, tan catyí tsi:

Tandihí nu ndacá ñaha rey nu ñuhu ñayíví, tsa yahá nanduví tsi tsa tsii Nyoo Jutu yo tan ra Cristo.

Tan ñia cua ndihí maa tsa ndacá ñaha ra naha, catyí ndusu can.

¹⁶ Tacan tan tsa oco cumi ra tsahnu tsa nyecú nu nyaá Nyoo, tsicuiñi tsití ra naha tan tsaquín ra naha nuu ra naha nda nu ñuhu. Tan jacaahnú ra naha tsi Nyoo. ¹⁷ Tan catyí ra naha:

Jutu Mañi ndi Nyoo ndi. Ra iyó tandihí tunyee iñi tsi.

Tacan ñi iyó maa un. Juvin un cuví Nyoo nda tsanaha tan vityin, tan juvin un cua quitsi.

Tsahá xaan ndi tyahvi nyoo tsi un,

Tyin tsa naquihín cuenda un tunyee iñi un.

Tan tsa quitsahá ndacá ñaha un.

¹⁸ Tan vasu ndi maa cuxaán nyíví iyó tandihí ñuu nahnu.

Maa tyin tsa tsaq quívi tatsi tuñi un tsi ñi.

Tan tsa tsaq quívi tsa jacutuñi un tsi ndiyí.

Tan cuhva un tsa vaha tsa taahán tsi tsi nyiví jahá tyiñu tyiñu un, ñi tsahá cuenda tuhun caahán un,
 ñi tsa nacuhvá cuenda añima ñi tsi un, tan jacahnú ñi siví un.

Vasu ndi maa cahnu cuví ñi o ndaahvi ñi.

Tan tsa tsaaç cuhva tsa janaa un tsi nyiví jatíví tsi nyiví iyó nu ñuhu ñayiví, catyí ra naha.

¹⁹ Tacan tan nuña yuvehe ñuhu Nyoo tsa iyó gloria, tan tsitsi vehe ñuhu can quituví tsatun cuenda tsa ndoo ra tyiñu tsihin yo. Tan quihví tatsa. Tan ñihí cuvaá tan caahán savi. Tan taqan. Tan ñihi xaan cucoyo yuu savi.

12

Nu nducú coo xaan tsa iyó ndaha tsi ñaha

¹ Tacan tan quituví tsa iyo cahnu ityi andiví. Quitá iin ñaha tan nditsí ña ñicanyii tumaa nditsí yo jahma. Tan tsañí ña nu yoo. Tan yihí iin corona tsa utsi uvi tiñuu jiñi ña. ² Tan ñaha ihya ñuhú sehe ña. Tan tsacú xaan ña tsihin tsa cuuhví tsitsi ña, tyin nyehé xaan ña tundoho. ³ Tacan tan quitá inga tsa iyo ityi andiví. Tan nyehé yu iin coo xaan tsa iyó ndaha. Cuaaha tí tan cahnu tí. Tan iyó utsa jiñi tí, tan utsi ndiquí tí. Tan yihí corona intuhun intuhun jiñi tí. ⁴ Tan tsihin juhma tí jacoyó tí tsa yatyin sava tiñuu tsa iyó andiví nu ñuhu ñayiví. Tan coo can tsicuiñí tí nuu ñaha tsa cua cacu sehe, tyin cuñí tí catsi tí sehe ña náa cuhva cacu ñi maa tsi. ⁵ Tan ñaha can jacacú ña iin rayíi. Tan juvin ra cua cundaca ñaha tandíhi nyiví iyó nu ñuhu ñayiví. Ñihi xaan cua cundaca ñaha ra tumaa tsa tsihin iin tatun tsa cuví caa. Tan tsa yahá cacú ra, naquihín

Nyoo tsi ra cuahán ra nu nyaá ra nu tyayu ra.
 6 Tan cuahán ñaha can tsinú xeehe ña ñuhu ityi, nu janduvahá Nyoo coo ña, tyin ican cua cuhva ra tsa catsi ña tsitsi tsa mil uvi cientu uñi xico quívi.

7 Yahá can tan tsicoq cuatyi nda andívì, cañi tahan ángel Miguel tan tandihí ángel tsa cutahán tsihin ra tsihin coo xaan can. Tan coo can tsihin tandihí tatyi ña vaha tsa cutahán tsihin tì, cañi tahan tì tsihin ángel Miguel. 8 Maa tyin ña cuví jaha canaa tì tsa cañi tahan tì. Tan ña ñihí ca tì nu ndoo tì nda andívì tsihin tatyi ña vaha tsa cutahán tsihin tì. 9 Tacan tan tava Nyoo tsi nu coo xaan can, nu Coo Tsaahnu, tan juvin ñi nu cuví nu ña vaha tan Satanás, juvin nu jandaví ñaha tsi tandihí nyívi iyó nu ñuhu ñayívi. Maa nu tan tatyi ña vaha tsa cutahán tsihin nu cucoyó nahnu nda nu ñuhu ñayívi.

10 Tacan tan tsiñi yu iin ndusu ñihí xaan ityi andívì, tan catyí tsi:

—Vityin tsa tsaa quívi tsa jacacú Nyoo tsi nyívi. Tsa jahá canaa tunyee iñi Nyoo. Maa ra tan ra Cristo, Sehe ra, ndacá ñaha ra na ha tyin tsa tava ra na ha tsi nu tsa tyaq̄ xaan cuatyi siquí ñi nuu ra na ha nduvi tan ñiñu. 11 Tan jaha canaq̄ ñi tsi nu tsihin ñiñi ra cuví Mbee Ticatyí Luhlu, tan tsihin tuhun Nyoo tsa cahān ñi tsihin nyívi. Ña nayuhví ñi cúu ñi tan tsahá cuenda ñi ñayívi ñi. 12 Yacan cuenda cusíi iñi nyoho tsa iyó andívì. Maa tyin jndahvi nyívi tsa iyó nu ñuhu ñayívi tan nu ndutya ñuhu! Tyin nu ña vaha nacavá nu nu ñuhu ñayívi nu yucú ñi. Tan xaan xaan cuñí nu tyin tsitó nu tyin ña cuaha ca quívi tan cundihí tsa jandaví ñaha nu tsi ñi.

¹³ Tan tsa nyehé nu coo xaan tsa iyó ndaha can tyin nacavá nu nu ñuhu ñayiví, quitsahá nyaá ndaha nu tsi ñaha tsa tsicoq sehe yíi can. ¹⁴ Maa tyin tsicoq uvi nditsin nahnu ñaha can tan caá can tumaa caá nditsin tasu. Tsicoq can tyin tacan tan cuví ndava ña tan cuhun ña cunu xeehe ña nu tsiquí nu ña cuví ñihí coo can tsi ña. Ican cuví nu cua ñihí ña tsa catsi ña tsitsi tsa uñi cuiya sasava. ¹⁵ Tan nu coo can tavá nu ndutya tsihin yuhu nu, tyin coo yutya cahnu, tan tañi ñaha can tsitsi yutya can. ¹⁶ Maa tyin ñuhu ñayiví jatyinyeé tsi tsi ña, tyin ndata tsi tan nanyee yutya tsa javahá nu coo tsihin ndutya tsa quitá yuhu nu. ¹⁷ Tan tsa ña cuví jaha canaa nu tsi ña, quitsahá cañí tahan nu tsihin nyivi cuví tata ña, ñi tsa tyá yahvi tuhun caahán Nyoo, tan nyicún ñi tsihin tsa níi iñi añima ñi tsa nditsa tsa caahán ra Jesucristo.

13

Nu nyehé ra Juan uvi quiti caquiñi

¹ Tan tsinyaá nyityi yu nu nyití yuhu ndutya ñuhu, nyehé yu quitá iin quiti caquiñi nu ndutya ñuhu can. Tan iyó utsa jiñi tí, tan utsi ndiquí tí. Tan iin tan iin ndiquí tí yíhí iin corona. Tan intuhun intuhun jiñi tí nyaá iin síví tsa caahán ndavaha ñi tsi Nyoo. ² Quiti caquiñi can caá tí tumaa caá cuñí. Tsaha tí caá tumaa caá tsaha oso. Tan yuhu tí caá tumaa caá yuhu ndicaha. Tan nu coo xaan tsa iyó ndaha can tsahá nu ndatu tsi quiti caquiñi can tsa cunyaa tí nu tyayu nu. Tan tsahá nu ndatu tsi tí tsa cundaca ñaha tí. ³ Tan nyaá iin nu caahví tsa cua cahñi tsi tí jiñi tí, maa tyin ndahá nu caahví

can. Tan tsa nyehé nyiví iyó nu ñuhu ñayiví ihya can, iyo xaan cuñi ñi. Tan quitsahá nyicún ñi tsi ti. ⁴ Tan jacahnú ñi tsi nu coo xaan can, tyin tsahá nu ndatu tsi quiti can. Tan jacahnú tucu ñi tsi quiti can, tan catyí ñi:

—¿Yoñi maa cuví tumaa cuví quiti ihya? ¿Tan yoñi cuví cañi tahan tsihin ti? —catyí ñi.

⁵ Tan ñihí tucu quiti can ndatu tsa cahan ndasi ti tan cahan ti ndavaha ñi siqui Nyoo. Tan cua cundaca ñaha ti uvi xico uvi yoo. ⁶ Tacan javahá ti: Cahañ tì tsi Nyoo. Cahañ tì ndavaha ñi nu iyó ra, tan siví ra, tan tsa iyó andiví. ⁷ Tan tsicoq tucu ndatu tsi tì tsa cañi tahan tì tsihin nyiví yihí cuenda Nyoo nda cuanda cuvi jaha canaa tì tsi ñi. Tan ñihí ndatu tucu tì tsa quihi ndaha tì tsi nyiví ndihi ñi tata, nyiví caahán siin siin yuhu, nyiví iyó tandihí ñi ñuu nyihi, tan ñuu nahnu. ⁸ Tan nyiví tsa ña cua coo ñayiví tsaa tsihin ra cuví Mbée Ticatyí Luhlu, ra tsa tsihí, ña cua coo ñi ñayiví tsaa can tsa cuenda tyin ña tsinyaq siví ñi nu libru ra tsa ndi cumañi ca tsinu ñuhu ñayiví. Tandihí maa ñi can cua jaca hnú ñi tsi quiti caquiñi can.

⁹ Tatum yihí ndo iyó soho ndo, tyaq soho ndo tuhun ihya: ¹⁰ Nyiví tyihí tsi inga nyiví vehe caa, cua cuhun tucu maa ñi vehe caa. Tan nyiví tsa tsahñí tsihin tsa xaan, juvin ñi maa tsihin can cua cúu ñi. Yacan cuenda nyoooho tsa yihí cuenda Nyoo cuñí tsi cunyee iñi ndo tan tsinu iñi ndo tsi ra.

¹¹ Yahá can tan nyehé yu quita inga quiti caquiñi tsitsi ñuhu. Tan iyó uvi ndiqui ti, caá can tumaa caá ndiqui mbee ticatyí luhlu. Maa tyin caahán ti tumaa caahán coo xaan tsa iyó ndaha can. ¹² Tan

ndacá ñaha t̄i tumaa ndacá ñaha inga quiti caquiñi can. Tan nyehé inga quiti can tsa ndacá ñaha t̄i. Tan natyuhú t̄i tsi ñuhu ñayivi tan nyivi iyó nu tsi na jacobnu ñi tsi inga quiti caquiñi tsa cuñi cūu jahä tsa caahvi tsa tsinyaq tsi t̄i. ¹³ Tan cuaha xaan tsa iyo javahä t̄i nda cuanda quita ñuhu andivi tan janacavä t̄i can nu ñuhu ñayivi tyin nyehe nyivi. ¹⁴ Tan jandavä ñaha t̄i tsi nyivi iyó nu ñuhu ñayivi tsihin tsa iyo tsa cuví javaha t̄i nuu quiti caquiñi tsa jihna ñi. Tavä tyiñu t̄i na javaha ñi iin tsitoho quiti caquiñi tsa tyahnyä caahvi tsihin mityi, tan ña tsihi t̄i. ¹⁵ Tan quiti caquiñi tsa tsinu uvi can tsicoq ndatu tsi t̄i tsa cuhva t̄i tsa coo nyito tsitoho quiti caquiñi tsa jihna can tyin tacan tan cuvi cahan tsi tan cahñi tsi tsi tandihí nyivi tsa ña cua jacobnu itsi. ¹⁶ Tan siñn tyin catyí tsi tyin cunyaa tuñi tsi tandihí nyivi; nyivi nyihi, nyivi tsahnu, nyivi cuca, nyivi ndaahvi, nyivi iyó nuña, tan nyivi iyó tsitoho. Tan cua cunyaa tuñi can ndaha cuaha ñi a nutyaan ñi. ¹⁷ Tan yoñi maa cuví jata tan xico tatum nduve tuñi can nyaá tsi ñi, o tatum nduve sivi t̄i, o número sivi t̄i nyaá tsi ñi. ¹⁸ Tuhun ihyá cuñi xaan tsi tsa tsinu tuñi. Nyivi cutuñi iñi, na jaha cuenda ñi número quiti caquiñi can. Tyin número rayii cuví can. Tan número can cuví iñu cientu uñi xico iñu.

14

Nu tsitá cientu uvi xico cumi mil nyivi iin yaa tan jacobnu ñi tsi Nyoo

¹ Yahä can tan nyehé yu tsi ra cuví Mbee Ticatyi Luhlu, nyaá nyityi ra jiñi yucu Sión. Tan yucú cientu uvi xico cumi mil rayii tsihin ra. Ra ihyá

naha ra cuví ra tsa nyaá síví ra tan síví Jutu ra nutyaan. ² Tacan tan tsíñi yu cucayú ityi andíví, tumaa cucayú yutya nahnu, tan tumaa caahán savi tsa ñihi xaan, o tumaa cuví nu javacú ra naha guitarra cuaha. ³ Tan tsitá ra naha iin yaa tsaa nu nyaá Nyoo nu tyayu ra, tan nu nyecú tsa cumi tsa nyito, tan nu nyecú tandíhi ra tsahnu naha ra. Tan yoñi maa cuví cutuhva yaa can, maa ñi maa tsa cientu uvi xico cumi mil rayí tsa cacú nu ñuhu ñayíví cuví tsitá can. ⁴ Ra ihyá naha ra cuví ra tsa ña tsicá nuu tsihin ñaha, tyin ii ra naha. Tan nyicún ra naha tsi ra cuví Mbee Ticatyí Luhlu tandíhi ñi ityi cuahán ra. Cacú ra naha tan juvin ra naha jamañí tsi ra naha nuu Nyoo tan nuu ra cuví Mbee Ticatyí Luhlu tsa jihna ñi. ⁵ Yoñi cuví catyi tyin vatya ra naha, tyin tsa cuenda Nyoo nduve ca cuatyí ra naha iyó tan yucú ra naha nu nyaá ra nu tyayu ra.

Tuhun tsa jacoto uñi ángel

⁶ Tacan tan nyehe yu ndavá inga ángel ityi andíví. Tan nyisó ra tuhun Nyoo tsa ña cua cundihi maa, tan tuhun can cuví tsa jacacú ra Cristo tsi yo. Tyin jacoto ra tuhun can tsi nyíví iyó nu ñuhu ñayíví; nyíví iyó tandíhi ñi ñuu nahnu, tan ñuu nyihi, nyíví tandíhi ñi tata, tan nyíví caahán siín siín yuhu. ⁷ Tan ñihi xaan cahañ ra tan catyí ra:

—Nayuhvi ndo tsi Nyoo, tan jācahuñu ndo tsi ra. Tyin tsa tahañ tsi cuhva tsa cua cutuñi nyíví. Jacahuñu ndo tsi ra javahä andíví tan ñuhu ñayíví, tan ndutya ñuhu tan ndohyo —catyí ángel can.

⁸ Tan catyí inga ángel tsa vatsí nyicún tsi ra:

—Tsa nduvä ñuu Babilonia tsa cuví ñuu cahnu, tsa taní tsi. Tyin nyíví iyó ñuu can jacuahä ñi tsa

caquiñi tsa javahá ñi tsi inga nyiví iyó nu ñuhu ñayiví. Tumaa tsa tsiní ñi tsihin vinu ña vaha, jahá ñi Babilonia cuví can —catyí ángel can.

⁹ Tacan tan vatsí tsa tsinu uñi ángel, tan ñihi cahañ ra tan catyí ra:

—Tatun ndáa nyiví jacobnu tsi quiti caquiñi can tan tsitoho ti, o cuhva ñi tsa cunyaa tuñi ti nutyaan ñi o ndaha ñi, ¹⁰ cua nyehe xaan ñi tundoho tyin cua tyihi Nyoo tsi ñi nu ñuhu, tan nu azufre. Tumaa tsa cua jacocho ra vinu xaan tsi ñi nuu ángel tan nuu ra cuví Mbee Ticatyi Luhlu cuvi can. ¹¹ Tan ña cua cundihi maa tsa quita yuhma nu nyehé ñi tundoho, tan ña cua quitatu maa ñi nduvi tan ñiñu. Ñi ihyo cuví ñi tsa jacobnu tsi quiti caquiñi can tan tsi tsitoho ti, tan tsahá ñi tsi ñi cunyaa tuñi siví ti. ¹² Yacan cuenda nyiví yihí cuenda Nyoo, tan tyaá yahvi ñi tuhun caahán ra, tan tsinú iñi ñi tsi ra Jesús, cuñí tsi tsa cunyee iñi ñi —catyí ángel tsa tsinu uñi can.

¹³ Tacan tan tsiní yu iin ndusu tsa quee nda andiví, tan catyí tsi tsihin yu:

—Tyaa tuhun ihyo: “Vityin tan ityi nuu, siíxaan cua cuvi tsi nyiví cua cíu tun tsinú iñi ñi tsi Jutu Mañi yo.”

Tan catyí Tatyi Ii Nyoo:

Nditsa, siíxaan cua cuvi tsi ñi tyin cua quitatu ñi tan ña cua jaha tyiñu ca ñi. Tan cua coo tsa vaha tsa javahá ñi tsihin ñi.

Nu cua tatsi tuñi Nyoo tsi nyiví

¹⁴ Tacan tan nyehé yu iin vico cuitsin. Tan nu vico can nyaá iin ra caá tumaa caá ra ñuu ñayiví. Yihí corona xuhun cuaan jiñi ra. Tan ndahá ra iin

mityi yacua tan xaan. ¹⁵ Tan quitá inga ángel tsitsi vehe ñuhu tan ñihí xaan caná tsaa ra tsi ra nyaá nu vico can. Tan catyí ra:

—Vityin jaha tyiñu tsihin mityi un, jataca cosecha un tsa iyó nu ñuhu ñayiví. Tyin tsa tsaa cuhva, tan tsa iyó nu ñuhu ñayiví tsa tsityí tsi —catyi ra.

¹⁶ Tacan tan ra tsa nyaá nu vico can jayahá ra mityi ra nu ñuhu ñayiví, tan naquihín ra tsa iyó nuu tsi.

¹⁷ Tacan tan quitá inga ángel tsitsi vehe ñuhu tsa iyó andiví. Tan juvin ñi ndahá tucu ra iin mityi yacua tsa xaan. ¹⁸ Tan quitá inga ángel nu nyaá altar, tan ra ihya iyó ndatu tsi ra tsa cundaca ñaha ra ñuhu tsa cayú. Tan caná tsaa ra tsi ra tsa ndahá mityi yacua tsa xaan can. Tan catyí ra tsihin ra:

—Jaha tyiñu tsihin mityi xaan tsa ndahá un juvin, tan cahnya cuenda ndoco yulu vixi tsa nañí uvas tsa iyó nu ñuhu ñayiví, tyin tsa tsityí tsi —catyí ra.

¹⁹ Tan jayahá ángel can mityi ra nu ñuhu ñayiví tan tsahnyá ra uvas can. Tan tyihí ra itsi iin nu tyihí ra tyin cua cuhñi ra itsi tan quita ndutya tsi. Tan yacan cuñí tsi catyi tsa cua tatsi tuñi Nyoo tsi nyiví. ²⁰ Tan nacuhñi ra uvas can ityi tsata ñuu, tan cuñí tsi catyi tyin cuaha xaan nyiví tsihi, tan nu cuví can, cuaha xaan cuaha xaan niñi ñi tsatí. Tan tsaaq tsi nda nu sucun nu yihí frenu yuhu cuayu, tan tsinú tsi tumaa uñi cientu kilómetro.

15

*Nu quitá ndihí utsa taahan ña tundoho tsa cua
nyehe nyiví*

¹ Nyehé yu inga tsa iyo cahnu andiví tan nayuhví xaan yu, nyehé yu utsa ángel tsa vatsí ndacá utsa taahan ña tundoho. Tsihin tundoho ihyá cua cundihi tsa xaan cuñí Nyoo nyehé ra tsi nyíví tsa ña tyáyahvi tuhun caahán ra.

² Tan nyehé tucu yu iin tsa caá tumaa caá ndutya ñuhu tsa tsinú tsihin yutyi. Tan tumaa tsa nasacá ñuhu tsihin tsi. Tan nyíví tsa cunyeé jahá canaa tsi quiti caquiñi can tan tsi tsitoho tí, tan ña tsinyaá número síví tsi ñi, tandihí ñi tan yucú ñi yuhu tsa nyehé yu can. Tan ndahá ñi tsa caá tumaa guitarra tsa tsahá Nyoo tsi ñi. ³ Tan tsitá ñi yaa ra Moisés, ra jahá tyiñu tyiñu Nyoo, tan yaa ra cuví Mbee Ticatyí Luhlu. Tan catyí yaa can tyehen:

Cahnu tan iyo xaan caá tandihí maa tsa javahá un, Nyoo, Jutu ndi, iyó tandihí tunyee iñi tsi un.

Ndoo xaan tan nditsa xaan ityi un,

Yooho Rey cuenda tandihí nyíví iyó nu ñuhu ñayíví.

⁴ ¿Yóo ña cua nayuhvi tsi un, yooho Jutu Mañi ndi? ¿Yóo ña cua jacobahnu tsi un?

Tan intuhun ñi maa un cuví ra ii.

Tan cua quitsi nyíví quee tandihí maa ñuu, tan cua jacobahnu ñi tsi un,

tyin nyehé ñi tsa vaha tsa javahá un, catyí yaa tsitá ñi.

⁵ Tacan tan nyehé yu nuñá yuvehe ñuhu tsa nyaá nda andiví nu yucú vaha nduvi tabla tsa nyaá ley Nyoo nuu. ⁶ Tan quitá utsa ángel tsa vatsí ndacá tsa utsa tundoho can tsitsi vehe ñuhu can. Nditsí ra na ha jahma vaha, cuitsin tan xiñu. Tan yihi cinturón xuhun cuaan yi qui nyica tsa intuhun intuhun ra na ha. ⁷ Tacan tan iin tsa nyito can, tsahá can intuhun intuhun coho xuhun cuaan tsi

tsa intuhun intuhun tsa utsa ángel can. Tan tsitu maa can tsihin tsa xaan Nyoo tsa cua tatsi tuñi ra tsi nyiví. Ra ican ña cua cundihi maa tsa iyó ra. ⁸ Tan tsitu maa tsitsi vehe ñuhu can tsihin yuhma tsa cuenda tsa cahnu xaan cuví Nyoo tan tsa cuenda tunyee iñi tsa iyó tsi ra. Tan yoñi maa cuví quihví tsitsi vehe ñuhu can tsitsi tsa ndi cumañi ndihí tsa utsa tundoho tsa vatsí ndacá tsa utsa ángel can.

16

Coho tsa yihí tundoho tsa cua jaquitsi tsa utsa ángel

¹ Tacan tan tsiñi yu iin ndusu ñihi xaan tsa quita tsitsi vehe ñuhu nu nyaá Nyoo. Tan catyí tsi tyehen tsihin tsa utsa ángel can:

—Cucacoyo ndo tsa yihí tsitsi coho ndahá ndo juvin siquirí nyiví iyó nu ñuhu ñayiví, tyin Nyoo cua tatsi tuñi ra tsi ñi —catyí ndusu can.

² Tacan tan tsahan iin ángel can tsicoyo ra tsa yihí tsitsi coho ra siquirí nyiví tsa nyaá tuñi quiti caquiñi can tan jachahnú ñi tsitoho ti. Tan quita nu caahvi xaan tan uhvi xaan tsi ñi.

³ Tacan tan coyo tsa tsinu uvi ángel can tsa yihí tsitsi coho ra nu ndutya ñuhu. Tan ndutya ñuhu can nanduví tsi niñi tumaa niñi ndiyí, tan tandihí tsa nyito tsa iyó tsitsi ndutya ñuhu can tsihí tsi.

⁴ Tacan tan coyo tsa tsinu uñi ángel can tsa yihí tsitsi coho ra nu yutya nahnu tan nu ndohyo tan nanduví tsi niñi. ⁵ Tacan tan tsiñi yu tsa caahán ángel cuenda ndutya tan catyí ra:

—Jutu Mañi yu, yooho vaha xaan un tyin tatsí tuñi un tsi nyíví tyehen. Jutu Mañi yu, Nyoo ii cuví un tyin nda nu quitsahá tandíhi tan nda cuenda vityin tacan ñi iyó maa un. ⁶Tatsí tuñi un tsi ñi tyin maa ñi tsatí ñi niñi nyíví yíhí cuenda un tan niñi ra cuví ndusu yuhu un. Tan vityin yooho tumaa tsa jacobó un niñi tsi ñi tyin tacan taahán maa tsi tsi ñi —catyí ángel can.

⁷ Tan tsíñi tucu yu nacahan inga ndusu ityi nu nyaá altar Nyoo tan catyí tsi tyehen:

—Nditsa, Nyoo, Jutu Mañi yu, ra iyó tandíhi tunyee iñi tsi, vityin tsa tatsí tuñi un tsi nyíví tsihin tsa nditsa tan tsihin tsandaa —catyí ndusu can.

⁸ Tan coyo tsa tsinu cumi ángel can tsa yíhí tsitsi coho ra nu ñicanyii. Tacan tan tsicoq ndatu tsi ñicanyii can tsa cahmi tsi tsi nyíví tsihin ñuhú tsi. ⁹Tan tandíhi nyíví ndasi xaan cayú ñi jahá ñicanyii can. Maa tyin vasu ndi maa tacan tahán ñi, ña nasamá ñi cuhva tsicoq ñi, tan ndi ña jacañu ñi tsi Nyoo. Tan cahan ñi ndavaha ñi siqui Nyoo, ra tsa jaquitsí tundoho can siqui ñi.

¹⁰Tan coyo tsa tsinu uhun ángel can tsa yíhí tsitsi coho ra siqui tyayu quítí caquiñi can. Tan ndunaá nu ndacá ñaha ti. Tan nyíví cuenda ti, nda cuanda tsatsí yíhí ñi yaa ñi tsa cuenda tsa nyehé xaan ñi tsa uhvi. ¹¹Maa tyin vasu ndi maa tacan cuví, ña jandíhi ñi tsa javahá ñi tsa ña vaha. Tan cahan ñi ndavaha ñi siqui Nyoo, ra nyaá andívi, tsa cuenda tsa uhvi nu caahvi ñi.

¹²Tan coyo tsa tsinu iñu ángel can tsa yíhí tsitsi coho ra nu yutya Eufrates cahnu. Tan ndoco ndutya can tyin tacan tan nuña ityi nu cua yaha ra

rey tsa quee ityi nu caná ñicanyii naha ra. ¹³ Tacan tan nyehé yu quitä tatyi ña vaha tsa caá tumaa caá sahva yuhu tsa intuhun intuhun quiti. Iin can quitä yuhu quiti caquiñi, inga can quitä yuhu coo xaan tsa iyó ndaha inga can quitä yuhu tsa cuví ndusu yuhu vatya. ¹⁴ Tatyi ña vaha can cuví tatyi nu ña vaha, tan nahnu tsa nyityi javahá nahnu. Quitá nahnu, jandu iín nahnu tandihí rey tsa iyó nu ñuhu ñayivi, tyin cañi tahan ra naha quivi tsaa quivi janaha Nyoo tyin iyó tandihí tunyee iñi tsi ra.

¹⁵ Tan catyí ra Cristo:

—Nyehe ndo tyin tsa vatsí yu tumaa vatsí iin ñasuhu tyin iin ñasuhu sana iñi ndo tan quihví ra tsitsi vehe ndo tacan yuhu. Sií xaan cua cuvi tsi nyivi ndatú quivi quitsi yu tan tsa iyó vaha jahma ñi tyin quivi cua tsaa yu ña cua nducahan nuu ñi tyin ña tandii ñi —catyí ra Cristo.

¹⁶ Tan cua ndu iin ra cuví rey naha ra nu nañí Armagedón tsihin yuhu hebreo.

¹⁷ Tan coyo tsa tsinu utsa ángel can tsa yihí tsitsi coho ra nu tatyi, tacan tan quitä iin ndusu nu nyaá tyayu Nyoo tsitsi vehe ñuhu tsa nyaá nda andivi. Canä tsaa tsi tan catyí tsi:

—Tsa iyó vaha vityin.

¹⁸ Tacan tan vaa ña maa cuví tan caahán savi tan cañi tatsa. Tan ñihi xaan taqñ nu ñuhu ñayivi. Tan ña tuhvá maa taán tacan tsa ndi quitsahä iyó nyivi nu ñuhu ñayivi. ¹⁹ Tan uñi nu ndatañ ñuu cahnu Babilonia can, jahä tsa taqñ. Tan tandihí ca ñuu tsa cayucuñ nu ñuhu ñayivi taní tsi. Nyoo ña naq maa iñi ra tsa javahä nyivi Babilonia. Yacan cuenda janyehé xaan ra tundoho tsi ñi. ²⁰ Tandihí maa

ñuhu tsa iyó tsitsi ndutya ñuhu tan tandihí yulu, tandihí maa tsi tsinaq. ²¹ Tan cucoyó cuaha yuu savi nahnu xaan tsa quee andiví siqui nyiví. Vee xaan tsi. Tumaa vee uvi xico kilu, tacan vee tsa intuhun intuhun yuu savi can. Tan nyiví cahán ñi ndavaha ñi siqui Nyoo tsa cuenda tundoho yuu savi can, tyin cuví tsi iin tundoho cahnu xaan tsa cuenda ñi.

17

Nu cua tatsi tuñi Nyoo tsi ñuu ña vaha

¹ Tacan tan quitá iin ángel tsitsi tsa utsa ra tsa ndahá coho can naha ra, natuhvá ra nu nyaá yu, tan catyí ra tsihin yu:

—Naha tyin janaha yu tsi un nácaa cua cutuñi ñaha ña vaha tsa tsicá nuu tsihin rayii, ña tsa nyaá nu ndutya cuaha. ² Tyin ra cuví rey nu ñuhu ñayiví tsicoo ra naha tsihin ña, tan tsa cuenda ña tiví tandihí nyiví iyó nu ñuhu ñayiví—catyí ra tsihin yu.

³ Tacan tan nyehé yu iin tsa janahá Tatyi Ii Nyoo tsi yu, tan tsindacá ángel can tsi yu nu tsiquí nu nduve maa nyiví iyó, tan juvin ñi ican nyehé yu iin ñaha yosó iin quiti cuaaha caquiñi. Nyecú sivi tsa caahán ndavaha ñi tsi Nyoo tsi ti. Iyó utsa jiñi ti tan utsi ndiquí ti. ⁴ Tan ñaha can nditsí ña jahma tijinda tan cuaaha. Tan cuaha xaan xuhun cuaan iñi tsi ña, tan yuu vaha, tan perla. Tan ndahá ña iin taza xuhun cuaan tsitú tsihin tsa ña vaha tan tsa caquiñi tsa javahá ña. ⁵ Tan nyaá iin sivi tsa cuví iin tuhun xeehe tsa ña cutuñi iñi nyiví nutyaan ña. Tan catyí can tyehen: “Ñaha ihya cuví ñuu Babilonia cahnu, sihi tandihí ñiñaha tsa tsicá nuu tsihin rayii tan sihi tandihí tsa ña vaha tsa iyó nu

ñuhu ñayivi.” ⁶ Tacan tan nyehé yu tyin tsiñí ñaha can jahá tsa tsihí ña niñí nyiví yihí cuenda Nyoo, ñi tsa tsihí tsa cuenda tsa cahañ ñi tuhun ra Jesú. Tsa nyehé yu tsi ña, iyo xaan cuñí yu. ⁷ Tacan tan catyí ángel can tsihin yu:

—¿Nacuenda iyo xaan cuñí un? Cua jacoto yu tsi un náa cuñí tsi catyí tuhun xeehe ñaha ihya tan quiti caquiñi tsa yosó ña, quiti tsa iyó utsa jiñi tan utsi ndiqui. ⁸ Quiti caquiñi tsa nyehé un can, juvin tí cuví quiti tsa tsicoó tan vityin nduve ca tí iyó. Maa tyin cua quita tí tsitsi yavi cunu tsa nduve nu tsindihí. Ican nyíi tí tsa ndi cumañi ca cuhun tí nu cua cundihí cuii tí. Nyiví iyó nu ñuhu ñayivi, ñi tsa nduve siví nyaá nu libru Nyoo nda quiví tsinú ñuhu ñayivi, iyo xaan cua cuñí ñi nyehé ñi tsi quiti can. Libru can catyí yóo nyiví cua coo cuii.

⁹ Tuhun ihya cuñí tsi tsa cutuñi iñi yo itsi: Tsa utsa jiñi quiti can cuñí tsi catyi tsa utsa yucu tsa nyaá ñaha can nuu. ¹⁰ Tan juvin ñi cuñí tucu tsi catyi can utsa rey. Uhun ra naha tsa yahá tsindaca ñaha ra naha. Tan tsa tsinu iñu rey ndacá ñaha ra vityin. Tan ra tsa tsinu utsa ndi cumañi cundaca ñaha ra. Quiví quitsi ra, ña naha cua cundaca ñaha ra. ¹¹ Tan quiti caquiñi tsa tsicoó tan vityin nduve ca tí iyó, juvin tí cuví iin rey tsitsi tsa utsa taahan rey can, tan cua cuví tucu tí rey tsa tsinu una. Tsa yaha cundaca ñaha nyico tí, tacan tan cua cuhun tí nu cua cundihí cuii tí.

¹² Tan tsa utsi ndiqui tsa nyehé un can, cuñí tsi catyi utsi rey tsa ndi cumañi cundaca ñaha. Cua coo ndatu tsi ra naha tsa cundaca ñaha rä naha iin ora, iin caa ñi tsihin quiti caquiñi can. ¹³ Tsa utsi rey can inducu ñi cua caca iñi ra naha. Tan cua

nacuhva ra na ha tunyee iñi tsa iyó tsi ra na ha tsi quítí caquiñi can. Tan tandihí ndatu tsa iyó tsi ra na ha cua nacuhva ra na ha tsi ti. ¹⁴ Tan cua cañi tahan ra na ha tsihin ra Mbee Ticatyi Luhlu. Maa tyin ra Mbee can, cua jaha canaa ra tsi ra na ha. Tyin juvin ra yihí ndaha tsi tandihí ra ndacá ñaha. Tan yihí ndaha tucu ra tsi tandihí ra cuví rey na ha ra. Tan nyiví yihí cuenda ra, maa Nyoo caná tsi ñi tan nacatsí ra tsi ñi. Tan nii xaan cuñí ñi nyicún ñi tsi ra.

¹⁵ Tan catyí tucu ángel can tsihin yu:

—Ndutya cuaha tsa nyehé un can, nu nyaá ñaha tsicá nuu can, yacan cuví nyiví iyó tandihí ñuu nyihi tan ñuu nahnu, ñi caahán siín siín yuhu. ¹⁶ Rey tsa cuví tsa utsi ndiquí quítí caquiñi tsa nyehé un can, ndasi cua cuñí ra na ha nyehe ra na ha tsi ñaha tsicá nuu can. Cua nacoo ihñi ra na ha tsi ña. Tan cua jatandihí ra na ha tsi ña; tan cua catsi ra na ha cuñu ñuhu ña. Tan cua cahmi ra na ha tsi ña. ¹⁷ Tyin Nyoo tsahá ra tsa caca iñi rey can na ha ra tyin javaha ra na ha cuhva cuñí maa Nyoo. Tyin iin ñi cuhva cua caca iñi ra na ha, tan cua cuhva ra na ha ndatu tsi quítí caquiñi can tsa cundaca ñaha ti tumaa rey nda cuando cundai tuhun caahán maa Nyoo. ¹⁸ Ñaha tsa nyehé un can, juvin ña cuví ñuu cahnu tsa ndacá ñaha tsi tandihí ra cuví rey nu ñuhu ñayiví.

18

Nu naá ñuu Babilonia

¹ Tsa yahá yacan tan nyehé yu queq inga ángel ityi andiví tan iyó xaan tunyee iñi tsi ra. Tan

ndunditsin ñuhu ñayiví jahá tsa nditsin ra. ² Tan caná tsaa ra tsihin tsa ñihi ndusu ra, tan catyí ra:

—Tsa tsindihí nuu ñuu Babilonia cahnu. Nanduví tsi nu iyó tatyí ña vaha, vehe tandihí nuu tatyí ña vaha, tan taca saa ña vaha tsa ña taahán iñi nyiví. ³ Tyin tandihí nyiví tiví ñi tsa cuenda cuatyí javahá ñuu Babilonia can. Ra cuví rey nu ñuhu ñayiví naha ra tumaa tsa tsicoq ra naha tsihin ñaha tsa cuví ñuu Babilonia can. Javahá ra naha cuatyí tsihin ña. Tan nyiví ñuhu ñayiví nducuca ñi tsihin tsa cuaha xaan tsa yahvi tsa jata nyiví ñuu can.

⁴ Tacan tan tsifí yu ndusu Nyoo ityi andiví, tan catyí tsi:

—Quita ndo ñuu ihya, nyooho tsa cuví nyiví yu, ña cutahan ndo tsihin nyiví ihya tan ña javaha ndo cuatyí tumaa javahá ñi cuatyí, tyin tacan tan ña nyehe ndo tundoho tumaa nyehé maa ñi. ⁵ Tyin tsa canyií tucuití cuatyí nyiví iyó ñuu can, nda cuanda tsaq can nu nyaá yu. Tan ñuhú iñi yu tsa ña vaha javahá ñi. ⁶ Cuhva ndo juvin ñi maa tsa tsahá ñi tsi inga nyiví tsi ñi; cuhva ndo uvi ca tsaha siqui tsa javahá ñi. Tacan janyehe ndo tundoho tsi ñi. Cuhva ndo tundoho nyehe ñi tsa ñihi uvi ca tsaha tan ñavin ca tsa tsahá maa ñi tsi inga nyiví. ⁷ Yacan cuenda cuhva ndo tsa iyo xaan tahan ñi tsihin tundoho nyehe ñi jaha ndo. Tahan ñi cuhva tsa jacobnú xaan ñi tsi ñi tan cusííxaan iñi ñi juvin cuhva can janyehe ndo tundoho tsi ñi. Tyin tsicá iñi tsitsi añima ñi: “Ihya nyecú yo tumaa iin reina. Ñavin ñaha ndaahvi cuví yo, tan ndi ña cua nyehe yo tundoho”, cuñí ñi, tsicá iñi ñi. ⁸ Yacan cuenda iin quiví ñi cua quitsi tundoho siqui ñuu can, cua quitsi tuhun tsiihí, tucuihyá iñi, tama, tan cua

cayu tsi tsihin ñuhu. Tyin yuhu iyó xaan tunyee iñi tsi yu tsa cuví yu Nyoo, Jutu ndo tan maa yu cua tatsi tuñi tsi nyívì ñuu can —catyí Nyoo.

9 Ra cuví rey nu ñuhu ñayívì ihyá tumaa tsa tsicoq ra na ha tsihin ñaha tsa cuví ñuu can, cua vacu xaan ra na ha, tan cuiihya cua cuñi ra na ha na nyehe ra na ha yuhma tsa cayu ñuu can. **10** Tan tsa cuenda tsa yuuhví ra na ha tundoho can, nda sava ñi cua cunyecu ra na ha. Tan cua catyi ra na ha:

—;Ndahvi yooho, ñuu cahnu Babilonia, ñuu tsa tsicoq cuaha tunyee iñi tsi! Tyin iin yaha ñi tsaa tundoho nyehé un —cua catyi ra na ha.

11 Tan ra tsa xicó ndaha tyiñu na ha ra, juvin ñi cua vacu xaan ra na ha tan cuiihya cua cuñi ra na ha tsa cuenda ñuu can. Tyin yoñi ca cua jata tsa xico ra na ha. **12** Tyin xicó ra na ha xuhun cuaan, xuhun cuitsin, yuu sií caá, perla, jahma linu, jahma seda, tan jahma tijinda cuaaha. Tan xicó tucu ra na ha tandíhi nuu vitu tami tan náa ndíhi tsa tsinu tsihin yíqui nuu landa, tan vitu sií caá, tan caa tsa cuví bronce, tan caa tsa cuví hierro, tan yuu tsa cuví mármol. **13** Tan xicó tucu ra na ha canela, náa ndíhi ca yucu tsa quíhví tsihin tsa tsatsí yo, tan tsa tami tumaa cutu, tumaa mirra, tan tumaa ndutyá tami. Tan xicó tucu ra na ha vinu, acetye, yutyi paan vaha, tan trigu. Tan juvin ñi xicó tucu ra na ha quiti cuenda carga, tan mbee, cuayu, carreta, tan nda cuanda nyívì tsa cuví musu tan xicó ra na ha. **14** Tan catyi ra na ha tsihin nyívì ñuu can tyehen:

—Nduve ca tsa sií caá tsa tsicoq tsi un, tsa taahán xaan iñi un. Tan tsa tsindíhi tandíhi tsa cuca un.

Tan ña cua ñihí ca maa un tandíhi yacan —catyí ra na ha.

¹⁵ Ra tsa xicó tandíhi can, nducucá ra na ha tsa cuenda tsa jatá nyívi ñuu Babilonia can tsa xicó ra na ha. Nda sava cua cunyecu ra na ha tsa cuenda tsa yuu hví ra na ha tsa cua nyehe nyívi can tundoho. Tan cua vacu xaan ra na ha tan cuiihya cua cuñi ra na ha. ¹⁶ Tan cua catyi ra na ha:

—¡Ndahví ñuu cahnu can! Cuví tsi tumaa iin ñaha tsa nditsí jahma linu, jahma tijinda cuaaha. Tan cucutú ña tsihin xuhun cuaan, tan yuu sií caá tan perla. ¹⁷ ¡Tan iin yaha ñi ndíhi tsa cuca xaan can! —cua catyi ra xicó can na ha ra.

Tan tandíhi ra cuví capitán tsa jacacá yutun ndoo nu ndutya, tsihin nyívi yucú tsitsi can tan tandíhi ra jahá tyiñu nu ndutya ñuhu na ha ra, nda sava cua ndoo ñi. ¹⁸ Tan tsa cua nyehe ñi yuhma tsa cayú ñuu can, cua cana tsaa ñi, tan cua catyi ñi:

—¿Náa inga ñuu tsicoq tumaa ñuu cahnu ihya? Nduve —cua catyi ñi.

¹⁹ Tan cua coso ñi nyaca jiñi ñi, tan cua vacu xaan ñi. Tan cuiihya cua cuñi ñi, cua cana tsaa ñi, tan cua catyi ñi:

—¡Ndahví ñuu cahnu can! Tyin tsihin tsa cuca tsi tan nducucá tandíhi yoo tsa tsicá nuu nu ndutya ñuhu tsihin yutun ndoo. ¡Tan vityin iin yaha ñi naq tsi! —cua catyi ñi.

²⁰ Maa tyin nyooho cüsii iñi ndo nyehe ndo tsa taahán ñuu can, nyooho tsa iyó andíví, tan nyooho ra tsicá tyiñu ra Cristo tan nyooho ra cuví ndusu yuhu Nyoo, tan tandíhi ca nyooho tsa yihí cuenda Nyoo. Cüsii iñi ndo tyin tsa cuenda tsa javahá ñi tsa ña vaha tsihin ndo tan tatsí tuñi Nyoo tsi ñi.

21 Tacan tan iin ángel tsa iyó xaan tunyee iñi tsi, cañihí ra iin yuu tsa caá tumaa caá iin yoso cahnu xaan, tan jacuhún ra can tsitsi ndutya ñuhu, tan catyí ra:

—Tyehen cua cundihi nuu ñuu Babilonia cahnu. Tan ndi iin tsaha ca tan ña cua nyehe ca ndo itsi.

22 Yoñi ca cua cata yaa tsitsi ñuu can, tan yoñi ca cua javacu arpa, tan yoñi ca cua tiví tiyoo, tan ndicaa. Tan ndi ña cua coo ca ra jahá tyiñu náa ndihí ca tyiñu. Tan ndi ña cua cucayu ca molino.

23 Tan ndi ñuhú tyuma, tan ña cua cayu ca tsitsi ñuu can. Ndi ña cua cuñi ca yo ndusu nyíví nu iyó vico tindaha. Tacan cua cuví vasu ndi maa ra xicó tsa tsicoq ñuu can naha ra, cahnu xaan tunyee iñi tsicoq tsi ra naha, tan jandaví ñaha xaan nyíví iyó ñuu can tsi tandihí nyíví iyó nu ñuhu ñayíví tsihin tuhun tasi.

24 Tyin cuaha xaan niñi ra cuví ndusu yuhu Nyoo canyií tsitsi ñuu can tyin tsahñí ñi tsi ra naha. Tan canyií tucu niñi inga ca nyíví yihí cuenda Nyoo, tan niñi tandihí nyíví tsa tsahñí nyíví nanii cahnu nu ñuhu ñayíví.

19

1 Tsa yahá yacan, tan tsiñi yu ndusu nyíví cuaha ity andíví. Tan catyí ñi:

¡Cahnu xaan cuví Nyoo! Jutu Mañi yo, Nyoo cuví ra ra jacacú tsi yo. Tan tsi maa ra taahán tsi jacobahu yo, tyin iyó xaan tunyee iñi tsi ra.

2 Tyin tsihin tsa vaha tan tsandaa tan tsa nditsa jacutuñí ra.

Tatsj tuñi ra tsi ñaha tsicá nuu tsa cuví ñuu Babilonia

tsa jativí xaan tsi nyíví iyó nu ñuhu ñayiví tsihin tsa
caquiñi tsa javahä ña tsihin ñi.

Tan tatsí tuñi ra tsi ña tsa cuenda tsa tsahñi ña tsi
nyíví jahá tyiñu tyiñu ra.

3 Tan catyí ñi inga tsaha:

—¡Cahnu xaan cuví Nyoo! Yuhma tsa cayú ña, ña
cua cundíhi maa tsa ndaa tsi ityi siquí —catyí ñi.

4 Tan tsa oco cumi ra tsahnu tan tsa cumi tsa
nyito tsa nyecú nu nyaá tyayu Nyoo, tsicuiñi tsiti ra
naha nda nu ñuhu. Tan jacobnu ra naha tsi Nyoo
nu nyaá ra nu tyayu ra. Tan catyí ra naha:

—¡Cahnu xaan cuví Nyoo! ¡Na cuvi tsi tacan!
—catyí ra naha.

5 Tan nu nyaá tyayu Nyoo, nacahan iin ndusu,
tan catyí tsi:

Jacobnu ndo tsi Nyoo Jutu yo
tandíhi nyooho tsa jahá tyiñu tyiñu ra,
tan tyaá yahvi ndo tsi ra, nyooho nyíví nyihi tan
nyíví tsahnu.

*Nu iyó vico tindaha ra Mbee Ticatyi Luhlu tan
nyíví tsinú iñi tsi ra*

6 Tan tsiní tucu yu ndusu tumaa cuví nu cuaha
xaan nyíví yucú, o tumaa ndusu nu cuaha xaan
yutya o tsa ñihi xaan caahán savi. Tan catyí tsi:

¡Cahnu xaan cuví Nyoo Jutu yo, ra iyó tandíhi
tunyee iñi tsi! Tyin tsa quitsahä ndacá ñaha
ra.

7 Na cusíi iñi yo tan na cutu yo tsihin tsa sii. Na
jacobnu yo tsi ra,

Tyin tsa tsaa cuhva tsa coo yo vico tindaha ra
Mbee Ticatyi Luhlu.

Tan yoo cua cuvi yo tumaa ñasíhi ra, tan ndatú yo
quíví tindaha yo tsihin ra.

⁸ Tyin tsa ñihí ndatu yo tsa cunditsi yo jahma cuitsin tsa ña nyahyu ca tsa cuví jahma linu. Tyin jahma linu can cuñí tsi catyi tsa vaha tsa javahá nyíví yíhí cuenda ra.

⁹ Tacan tan quitsahä catyí ángel can tsihin yu:

—Tyäa tyehen nu tutu: “¡Sii xaan cuvi tsi nyíví tsa cua cuhun nu tindaha ra Mbee Ticatyí Luhlu!”

Tan catyí tucu ra tyehen:

—Tuhun ihyá cuví tuhun nditsa Nyoo —catyí ra tsihin yu.

¹⁰ Tacan tan tsicuiñí tsiti yu nuu ángel Nyoo can tsa cua jacobino yu tsi ra. Maa tyin catyí ra tsihin yu:

—Ña jacobino un tsi yuhu, tyin yuhu musu Nyoo ñi cuví tucu yu tumaa yooho, tan tumaa tandíhi ra yañi un tsa tsinú iñi tuhun nditsa tsa cahán ra Jesucristo. Tsi Nyoo taahán tsi jacobino yo —catyí ra tsihin yu.

Tyin tsa cahán ra Jesús, yacan cuví tsa jandu iín iñi tsi ra cuví ndusu yuhu ra, ra tsahá cuenda tuhun caahán Nyoo tsihin yu.

Nu nyehe ra Juan tsi ra tsa yosó cuayu cuitsin

¹¹ Tacan tan nyehe yu tico hó andiví. Tacan tan quituvi iin cuayu cuitsin. Tan ra yosó tsi tí nañí ra Ra Nditsa Tsa Nii Iñi Jahá Tyiñu Tyiñu Nyoo. Tyin tsihin tsa ndaa jacutuñí ra tsi nyíví, tan ndaa javahá ra tsa cañí tahan ra. ¹² Tan tumaa caá nu cayú ñuhü, tacan caá tinuu ra. Tan cuaha xaan corona yíhí jiñi ra. Tan intuhun ñi maa ra tsitó iin siví tsa nyaá tsi ra. ¹³ Tan nditsí ra jahma cahyí tsihin niñi. Tan nañí ra Tuhun Nyoo. ¹⁴ Tan nyicún andaru andiví tsi ra, nditsí ra naha jahma vaha tsa

cuví linu, cuitsin tsi tan ña nyahyu tsi. Tan yosó ra na ha cuayu cuitsin. ¹⁵ Tan quitá iin mityi xaan yuhu ra, yacan cuví Tuhun Nyoo; tsihin yacan cua jañicueehe ra tsi nyíví iyó nu ñuhu ñayíví. Tan ñihi cua cundaca ñaha ra tsi ñi tsihin tatun tsa cuví caa. Cua tatsi tuñi ra tsi ñi tumaa jahvá ra tavá ndutya yucu vixi tsa cuví uva tsihin tsaha ra. Tan cua jaco ho ra vinu tsa tsinú tsihin uva tsi ñi, tsehe cuñí tsi catyi tyin cuxáán Nyoo tsihin ñi tan cua tatsi tuñi ra tsi ñi tyin tsahá xaan ñi tisihí tsi Nyoo, ra iyó tandihí tunyee iñi tsi. ¹⁶ Nu jahma ra tan nu sihín ra can nyaá letra tsa catyi tyehen: “Ra ihyá cuví ityi nuu tsihin tandihí rey. Tan juvin ñi ra cuví ityi nuu tsihin tandihí ra ndacá ñaha na ha ra.”

¹⁷ Tacan tan nyehe yu nyaá nyityi inga ángel nu ñicanyii. Tan ñihi xaan canā tsaa ra tsi tandihí saa tsa ndavá ityi andiví, tan catyi ra tsihin tí na ha tí:

—Nuu ndo tan ndu iin ndo tan cuxiñi ndo tsa tsaha Nyoo catsi ndo. ¹⁸ Cua catsi ndo cuñu ra cuví rey na ha ra tan ra cuví ityi nuu tsihin andaru na ha ra tsihin tucu ra xaan na ha ra. Tan catsi ndo cuñu cuayu tan cuñu ra tsicoso tsi tí na ha ra. Catsi ndo cuñu tandihí ra na ha, ra iyó tsitoho tan ra nduve tsitoho, tahan ñi nyíví nyihi tan nyíví tsahnu —catyi ra tsihin saa can na ha tí.

¹⁹ Tacan tan nyehe yu quíti caquiñi can tsihin ra cuví rey tsa iyó nu ñuhu ñayíví tsihin andaru cuenda ra na ha. Ndu iin ra na ha tsa cua cañi tahan ra na ha tsihin ra yosó cuayu cuitsin can tan andaru cuenda ra. ²⁰ Tiín ra yosó cuayu cuitsin can tsi quíti caquiñi can iin caa ñi tsihin ra cuví ndusu yuhu vatya can, tyin nuu quíti caquiñi can jahvá ra vatya can tsa nyityi, tan tsihin yacan

jandavi ñaha ra tsi nyiví tsa tsahá cunyaa tuñi quiti caquiñi can, tan tsi ñi jaca hnú tsitoho ti. Tan jacuhún nyito ra tsi nduvi taahan ra naha nu ñuhu tsa cayú tsihin azufre. ²¹ Tan tandihí ca ñi tsihí ñi tsihin mityi xaan tsa quitá yuhu ra yosó cuayu cuitsin can. Tan tandihí maa saa, tsatsí xaan ti naha ti cuñu ñi.

20

Nu nyehe ra Juan tsa cuenda tsa mil cuiya

¹ Tsa yahá can tan nyehe yu queé iin ángel ityi andíví, ndahá ra ndaha tucu yuvehe yavi cunu tsa nduve maa nu tsindihí. Tan ndahá tucu ra iin cadena cahnu. ² Tiín ángel can tsi nu coo xaan tsa iyó ndaha, tsa cuví Coo Tsaahnu can, tan cuví tucu nu ña vaha, tan nañí nu Satanás. Tsahñí ra tsi nu tsihin cadena iin mil cuiya. ³ Tan jacuhún ra tsi nu tsitsi yavi cunu xaan can. Nacasí ra yuhu yavi can, tan tyaq ra iin sellu yuhu can tyin tacan tan ña jandavi ñaha ca nu tsi nyiví iyó nu ñuhu ñayiví, nda yaha mil cuiya. Tsa yaha mil cuiya can, cua ndatsi nyico nu juhva ca quivi.

⁴ Yahá can tan nyehe yu nyecú cuaha tyayu. Tan nuu can nyecú nyiví tsa ñihí ndatu tyin tatsi tuñi ñi tsi nyiví. Tan nyehe tucu yu añima nyiví tsahnya nyiví jiñi tsa cuenda tsa cahán ñi tuhun Nyoo tsa tsahá cuenda ra Jesús tsi ñi. Nyiví ihya ña jaca hnú ñi tsi quiti caquiñi can, ndi tsi tsitoho ti, tan ndi ña tsahá ñi cunyaa tuñi ti nutyaan ñi, tan ndaha ñi. Nyehe yu nandoto ñi can tan tsindaca ñaha ñi tsihin ra Cristo tsitsi tsa mil cuiya can. ⁵ Ñi ihya cuví ñi tsa nandoto tsa jihna ñi. Maa tyin inga ndiyí ña nandoto ñi tyin cua nandoto ñi nda yaha

mil cuiya can. ⁶ ¡Sii xaan cuví tsi ñi tsa nandoto jihna tyin nacatsí Nyoo tsi ñi! Tan ña cua cuhun ñi anyaya nu tatsí tuñi Nyoo añima ña vaha tsa cua cúu nyíví tsinu uvi tsaha. Tyin cua jaha tyiñu ñi cuenda Nyoo tan cuenda ra Cristo. Cua cuvi ñi tumaa jutu tan cua cundaca ñaha ñi tsihin ra Cristo mil cuiya.

⁷ Tsa yaha mil cuiya can, cua ndatsi Satanás nu nyíi nu nuuhñí nu. ⁸ Cua quita nu, jandavi ñaha nu tsi nyíví Gog tan Magog, ñi xaan iñi tsi Nyoo tsa iyó naníi cahnu nu ñuhu ñayíví. Cua jandu iin nu tsi andaru ñi can tyin cuhun ra na ha cuatyi. Cuaha xaan ra na ha, tumaa cuaha nyítí yuhu ndutya ñuhu. ⁹ Tacan tan nyehé yu queē ra na ha naníi cahnu nu ñuhu ñayíví. Tan tyasī nduvi ra na ha nu iyó nyíví yihi cuenda Nyoo ñuu Jerusalén tsa cuñí xaan Nyoo. Maa tyin Nyoo januú ra ñuhu tsa queē andíví tan tsahmí tsi tsi tandíhi ra na ha. ¹⁰ Tan nu ña vaha tsa jandaví ñaha tsi ñi, jacuhún Nyoo tsi nu anyaya nu cayú ñuhu tsihin azufre, nu jacuhún ra tsi quítí caquiñi can tan ndusu yuhu vatya can. Ican cua nyehe nahnu tundoho tacan ñi maa, nduvi tan ñiñu.

Nu cutuñí nyíví ityi nu nyaá tyayu cuitsin nu nyaá Nyoo

¹¹ Tacan tan nyehé yu iin tyayu cuitsin cahnu. Tan nyehé yu tsi ra nyaá nuu can. Tan nyehé ra nu naq ñuhu ñayíví tan andíví. Tan ña ñihí tsi numaa cava tsi. ¹² Tan nyehé yu tandíhi añima nyíví tsihí, tahan ñi nyíví tsahnu tan nyíví nyihi, nyecú nyityi ñi ityi nuu Nyoo. Tacan tan nuñá libru tsa nyaá tandíhi tsa javahá ñi quíví tsicoó ñi. Tan nuñá tucu

inga libru nu nyecú siví nyíví tsa cua coo nyito tsihin Nyoo. Ndíyi can cua cutuñi ñi tsa cuenda náa ndíhi ca tsa javahä ñi tsa nyaá nu libru can. ¹³ Tan ndutya ñuhu nacuhvá cuenda tsi añima nyíví tsa tsihí tsa cumí tsi. Tan nu yucú añima nyíví tsihí tan Tuhun Tsiihí, nacuhvá cuenda nahnu añima nyíví tsa yihí ndaha nahnu. Tan tandíhi ñi cua tahan ñi nácaa javahä maa ñi. ¹⁴ Tacan tan Tuhun Tsiihí can tan nu yucú añima nyíví tsihí can cua jacuhun ndíhi Nyoo nduvi taahan can anyaya cahnu nu cayú ñuhu. Tan tsehe cuví tuhun tsiihí tsa tsinu uvi. ¹⁵ Juvín ñi ican jacuhun ra tsi nyíví tsa nduve siví nyaá nu libru nu nyecú siví nyíví cua coo nyito tsihin Nyoo tacan ñi maa.

21

Nu nyehé ra Juan andíví tsaa tan ñuhu ñayíví tsaa

¹ Yahä can tan nyehé yu iin andíví tsaa tan iin ñuhu ñayíví tsaa, tyin andíví tan ñuhu ñayíví tsa tsicoo jihna naq tsi. Tan tacan tucu ndutya ñuhu naq tsi. ² Yuhu ra Juan nyehé yu ñuu ii tsa cuví Jerusalén tsaa tsa queé nda nu nyaá Nyoo andíví, nyehé yu nuu tsi. Tan sihxaan caá cucutu tsi tumaa cucutú iin ñaha cua tindaha. ³ Tan tsiñi yu iin ndusu ñihi tsa quitá nda andíví, tan catyí tsi:

—¡Nyehé jihna! Iyó Nyoo mahñu nyíví. Cua coo ra tsihin ñi. Maa ñi cua cuvi ñi nyíví ra. Tan cua cunyaa ra tsihin ñi, tan cua cuvi ra Nyoo cuenda ñi. ⁴ Juvín ñi maa ra cua nacuhva ndutya nuu ñi. Ña cua coo ca tuhun tsiihí tan ndi tucuihya iñi. Ña cua vacu ca nyíví tyin ña cua nyehé ca ñi tundoho.

Tan ña cua nyehe ca ñi tsa uhvi. Tyin tandihí tsa tsicoq, tsa tsindihí tsi—catyí ndusu can.

⁵ Tacan tan ra nyaá nu tyayu cahnu can, catyí ra:
—Nyéhe jihna. Jandutsaq yu tandihí maa tsa tsicoq.

Tan catyí tucu ra:

—Tyáa tuhun caahán yu ihya, tyin tuhun nditsa cuví tsi. Cuítia iñi tuhun ihya tyin cua cundaa tsi —catyí ra tsihin yu.

⁶ Tsa yahá cahañ ra yacan tan catyí tucu ra:
—Tsa iyó vaha tandihí vityin. Yuhu cuví ra jihna ñi, tan yuhu cuví ra cua coo nu cua ndihí quivi: tumaa letra A cuví tsi letra jihna ñi tan tumaa letra Z cuví tsi letra nu ndihí ña. Nyívì tsa na ityi iñi cua cuhva yu ndutya coho ñi; tuhun ihya cuñí tsi catyi: Ñi cuñí tyaa soho tuhun yu, cua cuhva yu ñayívì tsa ña cua naa maa coo ñi, tan nduve yahvi tsi cua coo.
⁷ Nyívì jahá canaa tsi nu ña vaha, cua ñihí ñi tandihí tsa caahán yu tuhun ihya, tan cua ndoo ñi tsihin can. Tan yuhu cua cuvi yu Nyoo ñi tan maa ñi cua cuvi ñi sehe yu. ⁸ Maa tyin nyívì yuuhví xaan, ñi ña tsinú iñi, ñi quiñi iyó, ñi tsahñí, ñiñaha tsicá nuu tsihin rayíi, tan rayíi tsicá nuu tsihin ñaha, ñi tasi, ñi jacahnú tsitoho, ñi vatya; tandihí maa nyívì ihya taahán tsi cuhun ñi anyaya cahnu nu cayú ñuhú tsihin azufre, nu cuví tsa tsinu uvi tuhun tsiihí, nu tatsí tuñi Nyoo añima ña vaha.

Nu nyehé ra Juan nácaa cua cuvi ñuu Jerusalén tsaa

⁹ Tacan tan tsitsi tsa utsa ángel tsa ndahá coho tsitú tsihin tundoho, quitá iin ra tan natuhvá ra nu nyaá yu tan catyí ra:

—Cohon tsihin yu tan janaha yu nyiví yihí cuenda ra Cristo tsi un, ñi tsa cuví tumaa ñasíhi ra Mbee Ticatyi Luhlu —catyí ra tsihin yu.

10 Tan janahá Tatyi Ii Nyoo tsi yu tyin tsindaca ángel can tsi yu iin yucu sucun tan cahnu. Tan janahá ra ñuu ii, ñuu Jerusalén cahnu can tsi yu. Juvín ñi cuhva tsa vatsí nuu tsi tsa queé tsi andívi nu nyaá Nyoo. **11** Xiñu xaan ñuu can tsihin tsa sii caá Nyoo. Xiñu xaan tumaa iin yuu vaha tan sii caá, tumaa yuu jaspe, tumaa nyehé yo tsa nyaá inga tsiyo tsihin yutyi, tacan caá tsi. **12** Nii canduvi ñuu can nyaá iin cora sucun xaan. Tan iyó utsi uvi yuhu tsi. Tan nyaá nyityi iin ángel tsa intuhun intuhun yuhu can. Tan yuhu can nyecú sivi tsa utsi uvi sehe ra Israel ra cuví tsii tsaahnu yo naha ra. **13** Uñi yuhu cora can nyecú ityi nu caná ñicanyii. Tan uñi tsi nyecú ityi norte. Tan uñi tsi nyecú ityi sur. Tan uñi tsi nyecú ityi nu tyisó ñicanyii. **14** Utsi uvi yuu yihí nu cacu tsaha tsi. Tan nuu yuu can nyecú sivi tsa utsi uvi ra tsa tavá tyiñu ra Mbee Ticatyi Luhlu.

15 Tan ángel tsa cahán tsihin yu, ndahá ra iin metru tsa tsinu tsihin xuhun cuaan, tsihin yacan tyihí cuhva ra ñuu can, tan yuhu cora can tan nanii canduvi cora ñuu can. **16** Iyó cumi taahan tutun ñuu can. Tan inducu ñi tsa quiihin tan tsa cañi tsi. Tan tyihí cuhva ángel can ñuu can tsihin metru xuhun cuaan can. Tan quitá uvi mil uvi cientu kilómetro. Iin ñi cuhva tsa cañi tan tsa sucun tan tsa quiihin. **17** Tacan tan tyihí cuhva ra cora ñuu can. Tan quitá uñi xico cumi metru tsa quiihin, tyihí cuhva ra tumaa tyihí cuhva nyivi.

18 Tsihin yuu jaspe samä cora ñuu can. Tan maa ñi maa xuhun cuaan cuví ñuu can. Tan caá tsi tumaa caá yutyi tun ndoó vaha tsi. **19** Tan tsaha cora can samä tsi tsihin tandíhi ñi nuu yuu sii caá: yuu tsa jihna ñi cuví jaspe; tsa tsinu uvi cuví zafiro; tsa tsinu uñi cuví ágata; tsa tsinu cumi cuví esmeralda; **20** tan tsa tsinu uhun cuví ónica; tsa tsinu iñu cuví cornalina; tsa tsinu utsa cuví crisólito; tsa tsinu una cuví berilo; tsa tsinu iin cuví topacio; tsa tsinu utsi cuví crisoprasa; tsa tsinu utsi iin cuví jacinto; tan yuu nu ndíhi ña cuví amatista. **21** Tsa utsi uvi yuhu cora can tsinú tsi tsihin utsi uvi perla. Intuhun ñi perla cuví tsa intuhun intuhun tsi. Tan nu cuví ityi cahnu ñuu can, maa ñi maa xuhun cuaan cuví tsi, tumaa iin yutyi. Tyin iin yutyi cuví nyehe yo tsa nyaá inga tsiyo tsi tsihin tsi, tacan caá tsi.

22 Ña nyehé maa yu ndi intuhun vehe ñuhu tsitsi ñuu can, tyin maa Nyoo Jutu yo, ra iyó tandíhi tunyee iñi tsi, tan ra Mbee Ticatyi Luhlu cuví vehe ñuhu ñuu can. **23** Ña tsiñi ñuhu tsa jandunditsín ñicanyii ñuu can tan ndi tsa jandunditsín yoo. Tyin juvin ñi maa tsa nditsin Nyoo tan tsa nditsin ra Mbee Ticatyi Luhlu jandunditsín tsitsi ñuu can. **24** Tandíhi nyívi tsa cacü añima, cua caca nuu ñi nu nditsin can. Tan ra cuví rey nu ñuhu ñayívi naha ra cua cundaca ra naha tsa cuca ra naha tan tandíhi tsa cahnu cuví ra naha ñuu can. **25** Ña cua cundasi yuhu cora tsa tsinu cahñi, tan ña cua coo tsacuaa ñuu can. **26** Tan tandíhi tsa cuca, tan tsa cahnu, tsa iyó nu ñuhu ñayívi cua tsaa tsi ñuu can. **27** Maa tyin ña cua cuvi quíhví tsa caquiñi, ndi intuhun nyívi javahá tsa caquiñi, tan ndi ñi vatya. Intuhun ñi

maa nyiví iyó siví nu libru ra Mbee Ticatyi Luhlu cua cuvi quihví, tan cua coo nyito tsihin ra tacan ñi maa.

22

¹ Tacan tan janahá ángel can iin yutya cuii xaan tsi yu. Ndutya tsa tsahá tsa coo nyito yo cuví. Cuii xaan tsi tumaa cuii iin yutyi vaha. Tan quitá ndutya can nuu nyaá tyayu Nyoo tan nu nyaá ra Mbee Ticatyi Luhlu. ² Mahñu tsitsi ityi cahnu ñuu can tan nduvi tsiyo xiin yutya can, nyecú yutun tsa tsahá tsa coo nyito yo. Tsahá tun naha tun tsiti tan iin tan iin yoo. Tan tsa iin cuiya tsahá tun naha tun tsiti utsi uvi tsaha. Tan ndaha numa tun vaha tsi cuví tsi numeri tsi nyiví iyó nu ñuhu ñayiví. ³ Nduve maa tsa ña vaha cua coo ñuu can tyin ican nyaá tyayu Nyoo nu nyaá ra tan cua cundaca ñaha ra tsihin ra Mbee Ticatyi Luhlu. Tan cua jacobnu nyiví yihí cuenda ra tsi ra. ⁴ Tan cua nyehe tsihin nuu ñi tsi ra. Tan cua cunyaa siví ra nutyaan ñi. ⁵ Ña cua coo ca tsacuua ican. Tan nyiví tsa cua coo ican ña tsiñi ñuhu ñuhu candili tsi ñi, ndi ñuhu ñicanyii, tyin Nyoo Jutu yo cua jandunditsin nu cua coo ñi. Tan maa ñi cua cundaca ñaha ñi tsihin ra tacan ñi maa.

Nu janahá tsi tyin tsa cuyatyin quitsi ra Cristo

⁶ Tacan tan catyí ángel can tsihin yu:

—Tuhun ihya cuví tuhun nditsa, tan cuví cuita iñi un itsi tyin cua cundaa tsi. Maa Nyoo Jutu yo ra cahañ tsihin ra cuví ndusu yuhu ra tahañ tsanaha, juvin ra jacuhun ángel ra, tyin janaha ra tsi nyiví jahá tyiñu tyiñu ra náa cua cuvi tsa numi ñi —catyí ra.

Tan catyí Jutu Mañi yo:

⁷ —¡Tsa cuyatyin quitsi yu! —catyí ra.

¡Sií xaan cuví tsi nyíví tsa javahá cuhva caahán tuhun Nyoo tsa nyaá nu libru ihya!

⁸ Yuhu ra Juan, tsíñi yu tan nyehe yu tandíhi tuhun ihya. Tsa yahá nyehe yu tan tsíñi yu itsi, tsicuiñi tsítí yu tsaha ángel tsa janahá itsi tsi yu, tyin jacobnu yu tsi ra. ⁹ Maa tyin catyí ra tsihin yu:

—Ña jacobnu un tsi yuhu, tyin yuhu, musu Nyoo ni cuví yu, tumaa yooho tan tandíhi ca ra yañi un tsa cuví ndusu yuhu Nyoo, tan tumaa tandíhi ca nyíví tyaá yahvi tuhun nyaá nu libru ihya. Intuhun ñi Nyoo taahán tsi jacobnu yo —catyí ra tsihin yu.

¹⁰ Tan catyí tucu ra tsihin yu:

—Ña tyíhi xeehe un tuhun Nyoo tsa nyaá nu libru ihya, tyin tsa yatyin cuii cundaa tsi. ¹¹ Maa tyin jañia ndaha tsi nyíví caquiñi, na javaha maa ñi cuhva cuñí maa ñi. Tan nyíví iyó cuatyí, na coo ca cuatyí ñi. Maa tyin nyíví javahá tsa vaha, na jañihi ca ñi javaha ñi tsa vaha. Tan nyíví tsa jandu í Nyoo, na cunyicun vaha ca ñi tsi ra —catyí ra tsihin yu.

¹² Tan Jutu Mañi yo catyí ra:

—Nyéhe ndo. Tsa cuyatyin quitsi yu. Tan tyahvi yu tsi intuhun intuhun nyíví tsa cuenda tsa javahá ñi, a javahá ñi tsa vaha o tsa ña vaha. ¹³ Yuhu cuví ra jihna ñi, tan yuhu cuví ra cua coo nu cua ndíhi quíví, tsa iyó maa yu nda nu quitsahá tandíhi tan tacan ñi maa cua coo yu nu cua ndíhi tumaa letra A cuví tsi letra jihna ñi tan letra Z cuví tsi letra nu ndíhi ña —catyí Jutu Mañi yo.

14 Siii xaan cuvi tsi nyivi tsa nacatyá jahma, [ñi janduvahá añima], tyin cua ñihí ñi ndatu catsi ñi tsiti yutun tsa tsahá tsa coo nyito añima yo. Tan cuví quihvi ñi yuhu cora ñuu can. **15** Maa tyin nyivi javahá tsa caquiñi, tumaa ñi tasi, rayiii tsa tsicá nuu tsihin ñaha tan ñiñaha tsa tsicá nuu tsihin rayiii, tan ñi tsahñi, tan ñi jacahnú tsitoho, tan tandihi ñi vatya, tan ñi jandaví ñaha; tandihi maa ñi can, ña cua quihvi ñi tsitsi ñuu can.

16 Tan catyí tucu Jutu Mañi yo:

—Yuhu ra Jesús, jacuhun yu ángel yu tyin jacoto ra tandihi tuhun ihya tsi nyivi tsicá vehe ñuhu. Yuhu cuví nyivi tsahnu ra rey David. Tan cuví tucu yu tata ra. Tan cuví tucu yu tiñuu cahnu tsa xiñu xaan, tsa caná tsa naa ca —catyí ra.

17 Tatyi Ii Nyoo tan nyivi yihi cuenda ra, ñi tsa cuví tumaa ñasihi ra Mbee Ticatyi Luhlu, catyí ñi tyehen:

—Náha ñi, Jutu Mañi yu —catyí ñi.

Tan nyivi tsa tsiní tuhun ihya, na catyi ndihi ñi:

—Náha.

Tan nyivi na ityi iñi tan tandihi nyivi cuñí quitsi, na quitsi ñi tan coho ñi ndutya tsa tsahá tsa coo nyito añima yo, tan nduve náa cua tyahvi ñi.

18 Tan tandihi nyoooho tsa tsiní tuhun Nyoo tsa nyaá nu libru ihya, cuñí yu catyi yu tsehe tsihin ndo: Nyivi tsa cua janducuaha ca tuhun ihya, Nyoo cua janducuaha ca ra tundoho tsa nyaá nu libru ihya siquí ñi. **19** Tan nyivi tsa cua quinyaa juhva tuhun Nyoo tsa nyaá nu libru ihya, Nyoo cua quinyaa ra tsa taahán tsi tsi ñi tsa nyaá nu libru tsa caahán yóo nyivi cua coo nyito, tan ña cua cuhva

ca ra coo ñi ñuu ii. Tan ña cua ñihi ñi tsa vaha tsa caahán libru ihyá tuhun. ²⁰ Tan Jutu Mañi yo, ra tsa tsahá cuenda tuhun ihyá catyí ra tyehen:

—Tsa nditsa tyin tsa cuyatyin quitsi yu —catyí ra.

Tan yuhu catyí yu:

—Na cuví tsi tacan. Náha ñi, Jutu Mañi yu, Jesús —catyí yu.

²¹ Na naquihin tandíhi ndo tsa vaha tsa tsahá Jutu Mañi yo Jesucristo tsi yo.

Tan na cuví tsi tacan ñi.

**Tuhun tsaa tsa nacoo jutu mañi yo Jesucristo
tsi yo**

**New Testament in Mixtec, San Juan Colorado
(MX:mjc:Mixtec, San Juan Colorado)**

copyright © 1994 Wycliffe Bible Translators, Inc.

Language: Mixtec, San Juan Colorado

Translation by: Wycliffe Bible Translators, Inc.

Mixteco, San Juan Colorado [mjc], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, San Juan Colorado

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

c270ec54-172a-541f-83e6-7760f619c744